


午夢堂集





第一輯
第四十九種

據原刊本排印
貝葉山房張氏藏版

午夢堂全集

上冊

明·葉天象纂輯

午夢堂集序

閩秀詩唐人故不能多。惟楊盈川姪女有粧成書懷一首。其餘若李季蘭薛玄度花蕊夫人皆瑣尾失節之流。不足道也。徐淑以伉儷倡酬。左芬以兄妹往復。班婕妤之團扇詞。蘇伯玉妻之盤中歌。令人不能不追憶於漢晉耳。然其篇什亦自寥寥。累而成帙者無有焉。我明漢士齊始有集。士齊出自閩。閩名家。伉儷兄妹。唱酬往復。洋洋灑灑。可謂盛矣。但其末年爲弟也未軒者爲子也。仲招者爲壻也。子充者及其女之適于鵝湖者。俱先夫人而逝。箴箴獨立。只一老媪。涕泣漣如。殆無生趣。信乎文人多阨。不獨須眉。彤管玉臺。俱所難免矣。以余頃讀午夢堂集。沈宜修迺余同籍。懋所先生女也。幼字宛君。夙通經史。搦管成章。逼真風雅。有棘手枯眉之輩。所不敢望者。至若佳偶名門。宜家水部。男女遶膝。無不韻美。處倫理之順。得性情之正。樂琴瑟之調。鬯在陰之和。故詩勿慮其不成集。而篇勿慮其不廣。句勿慮其寡和矣。亡何造物忌完。世界闕陷。宛君有少女瓊章。及笄而夭。君哭之而慟。其長女昭齊。亦以哭妹而傷。未幾與宛君俱仙逝矣。嗚呼。家珍國寶。煙消雨散。行路之人。亦知心惻。況乎水部。鍾情山盟。頓裂宮商。不御澤跡。空存耳目。見聞。何以堪此。所以掩淚開箱。遺荆壽叢。不忍祕諸柩中。而欲傳之海內者也。余

僭選明詩。如獲拱壁。距惟閨秀。足當大家。乃擷其菁華。刻之如左。實拔藻之同心。非阿私其所好云。時崇禎己卯重陽日。西峯居士曹學佺能始撰。

序

丈夫有三不朽。立德立功立言。而婦人亦有三焉。德也。才與色也。幾昭昭乎。鼎千古矣。然
視天淑女。河淇碩人。不啻於色豔稱之。楚騷亦曰。姱容修態。絙洞房。蛾眉曼綠。目騰光。似乎婦
人。故當標妍競嬈。以色特著焉者。才德俱非所軒輊爾。及乎奉倩傷神。矯情辭重。後世儒者。又
必欲摘其偏繆。訾其淫靡。故爲置色弗譚。而桃穠薜英之遺音。若深諱於士大夫之口。自非椒
庭玉顏。不殊衆也。昭陽華清。留裙賜浴。而外。卽麗奪夷光。姣傾鄭日。倘有延年之歌。薦譽閨閣。
發穎匿矣。故自冶容諱談。折鼎一足。而才與德。迺兩尊於天下。夫旣兩尊於天下。然衡才於今。
亦猶色焉。寥寥罕所揚說。則又何也。蓋貴富者。綺紈珠翠。蕭笙歌舞。其於纏綿。弗孺習也。下者
刺繡拈鍼。流黃織錦。甚逮僖餼滄澗。躬親御之。其於譚黷。弗暇識也。紅香視草。素粉題箋。才亦
豈易言哉。才旣不易言。而色又欲諱於言。士大夫又不肯泯泯。其家之婦人女子。則不得不舉
二者以盡歸之於德。於是閨傳青史。壺列彤碑。湘東三管。靡可勝書矣。是非標腴擷潤。閨寂知
彼。萃芳集嫩。若斯繁會也。則煒管難眞。而內則易膺也。蓋其名彌茂。斯其飾彌工。家本膺華。必
陳害澁之誦。質弛脂黛。蚤著無非之儀。樂其采繁。卽爲祈童之被。繼以樛木。如見葛藟之縈。洎

於勤襄昭美。杆紋擊奏。敬共明孝。調旨粉榆。爰相天子。靜琴繼好。誕成哲後。徽音嗣響。彰善表微。亦云侈矣。會有詆金屏之淑慎。以牝雞之司。毀玉帳之嘉懿。以生蛇之妬者哉。低徊聽聞之餘。幾有無徵不信之慨。則攷德故弗若衡才實矣。所以大聖人刪詩三百。於婦女所作。無論采薇。將莖。飛雉。流泉。卽狡童狂且之什。在所不廢。夫非才難之歎。不其然乎。雖然才亦奚貴之有。間嘗歷攷古昔宮闈弗具列矣。若大家文君。令嬾徐淑。詎不標美千載。垂著紀傳。而鳳泣鸞悲。俱傷蚤寡。令暉容華。不聞諧偶。蘇蕙羽仙。終爲怨婦。安仁悼亡之懷。長思翰墨。崑卿月明之夜。空聽歌辭。然則調絲振躡。擣石移梭。心糊錦字。目眯銀書。卽可安榮禔福。壽豈甯居。何必筆床硯匣。珠管芸箋。反令茫茫小兒。顛倒弄哉。斯知矜炫閨才。又非亟務者也。我內人沈宛君。夙好文章。究心風雅。與諸女題花賦草。鏤月裁雲。一時相賞。庶稱美譚。而長女昭齊。逾二十以鬱死。季女瓊章。方破瓜以仙死。今宛君又以孝感感悼。短算長徂。流水無歸。彩雲去遠。遺文在篋。手澤空悲。珠玉停輝。瓊瑤隕色。甚矣才之累人矣。令宛君與兩女未必才才未必工。何至招殃造物。致忌彼蒼。但使椎髻無文。卽擬梁鴻之婦。蓬頭失禮。居然王霸之家。豈不青門共隱。白首同期。而琴斷徽亡。簫殘鏡破。生人不幸。至於斯歟。嗚呼傷哉。德非上哲。成無愧於賢媛。色僅中人。敢自誇爲麗匹。惟是謝簾雪散。劉匣椒摧。中郎之絃。無絲再續。桓生之笛。眞欲奈何。孫楚情文。徒傷心於伉儷。江淹夢寐。空屑涕於嬋娟。可悲也夫。

崇禎丙子春王三月。天寥葉紹袁謹。

鷓鴣吹集序

嗚呼。余安忍序吾姊哉。姊長余一歲。分梨鑿錢之景。儼然在目。俄成隔世。石火電光。恍如夢幻。故姊氏歿後。余家業都捐。無意人世。臨風追念。惟有涕淚盈把。寧復堪詮。次其斷腸也。且余又何能序吾姊哉。姊淑德麗才。掩燭風人。擅徽來哲。克爲女範之宗。寧僅如世之閨秀。稍能弄柔翰者比。余襪線寸短。生平期許。彈缺無成。行將以頭陀老。又安能以玄晏重吾姊也。乃仲韶再以書趣余。必欲一言弁首。豈非以女子行。不出閨闈。昭詠絮之才。必將於封胡。遇末徵信也。於是爲之投淚言曰。語云。詩能窮人。詎不信歟。豈直龍門湘水。侔傑畢世。卽團扇流黃。女子不免。蓋靈根慧業。造化所靳惜。而窮鬼所擲。揄有絲來矣。姊氏夙具至性。四五齡卽過目成誦。瞻對如成人。憲副先子甚鍾愛之。恆抱弄於膝。不肖弟幼頑劣。爭棗栗。輒烏獸舐姊。姊弗恚。以好言解之。先大人相顧。詫爲不凡。顧恭人樹蔭不永。先子棲心禪觀。以兒女累多。爲蘋飄散去。心獨憐姊。迎姑氏張孺人撫之。葦簾藥室。宛似幕門之胤。所謂綺閣金鋪者。無有哉。幼無師承。從女輩問字。得一知十。遍通書史。將笄。遂手不釋卷。每念顧恭人蚤棄。琉璃硯匣之旁。鳧鑿繡牀之暇。時有涕汎瀾也。十六而歸仲韶。若貧女稱有室矣。襍囊木櫝而往。贊脯不具。無以籍稱。

宦門送女者。姊恬然自適也。姑馮太夫人年高。姊矜嚴事之。箴管觸燧。與茗羹佐餽。每下氣柔聲。猶恐逆姑心。迨夫兒女林立。姑少有不懌。姊長跪請罪。如此終身。馮太夫人久而益怡。雖古稱孝行如崔遠之母者。奚以加茲。仲韶鵲起時髦。珠瑩玉秀。克稱王謝風儀。姊靜琴既翕。益肆力於縹緗。或作頌春椒。或儷銘秋菊。中閨倡和。業日以富。然仲韶累屈秋闈。偃蹇諸生間。家殊飄落。姊從牛衣中互相勉勵。未嘗作妾面羞郎之詞也。迨仲韶登南宮。受鸞諧稱命婦矣。姊處之淡然。略不色喜。屬仲韶數奇落拓。一官浮沈金馬。產逾益削。上世菟裘良畚。盡折入子母家。姊簪珥纈繡。悉以佐不贍。篋無餘飾剩襦。而姊諱言貧。上事下育。勉力拮据。融融洩洩。不以動馮太夫人心。然米鹽漿酒之暇。不廢吟詠。故其從政白門。爰有楊柳藏鴉之句。聞警甘泉。不無寒碇木葉之思。生平鍾情兒女。皆自爲訓詁。豈第和膽停機。亦且授繩課藝。當夫明月登臺。則簫史共賦。飛霞集戶。則謝女呈篇。飲醪則誇北海之兩男。辨絃共佳伯喈之幼女。既蘭芳而蕙茂。亦瓊映而玉暉。花萼相鮮。人倫盛事。洵爲寡儔矣。無何而少女瓊章。玉樓先召。長女次兒。相繼夭折。禍且延於馮太夫人。逾年之間。不祥駢集。既滋喪明之傷。復加殞妣之慟。血盡骨立。竟以身殉。嗚呼痛哉。概姊之爲人。天資高朗。真有林下風氣。古來女史。桓孟不聞文藻。甄蔡未嫻禮法。惟姊兼而有之。生平不妄言笑。而和煦之意。藹於顏面。風度夷遠。不喜作時世裝束。然一

旋折一啓粲。姊妹中明慧者爭相效之。終身莫及。人情機警者鮮忠厚。姊於人情曲折。悉若列眉。終不盡言以翹人。徐以片語應酬。則譚言微中。盡爲解頤。而行已每衷於古人。報施必從其厚道。處利家之冷煖。介阮氏之貧富。意泊如也。獨賦性多愁。洞明禪理。不能自解免。雖一生境遇。坎壈爲多。亦良繇稟情特甚。山花開落。隴月盈虧。光陰往來。榮瘁互代。而臺前鏡裏。偏多躑躅之懷。綠水芳叢。恆如搖落之感。當夫博山煙定。竹戶風來。塔除移半。慧之影。燭花垂一寸之施。觸緒興思。動成悲惋。香箋盈淚。彩筆餘辛。奚必迴軫隕涕。聞笛傷心。今閱其遺編。如怨鶴空山。離鴻朝引。令人恍恍。殆不欲生。所謂沈悲生疾。積痛傷年。竟以憔悴一生。齋志玉殞。嗚呼痛哉。則詩能窮人之語。不其然乎。不其然乎。當余仗劍塞上。微逐黃沙白草。金戈鐵馬之中。世味咀蠟。誓不復歸。以緘書寄姊。訂無生大業。姊報章言。從夫既貴。兒女盈前。若言無福。似乎作踐。但日坐愁中。未知福是何物。此生業重。惟有皈向空王。以銷之耳。其生平情況。大都若此。雖然。使仲韶綰綬崢嶸。家擁金穴。姊珩璜節步。暉曜中閨。亦不過所稱副笄六珈。享世之癡福已耳。又安所得金石之錄。與采葛織錦。共垂不朽。所得孰與仲多。詩未必能窮人。姊又可一笑於寒原矣。集若干卷。聊贅數言。用質震旦閨秀。非第爲玉臺嗣詠已也。

崇禎丙子寒食前一日。弟沈自徵拜手譔。

伯姊葉安人宛君遺集序

蓋容暉易謝。才識難亡。聲采不凋。芳華彌永。矧夫神朗金閨。則錦叢冥色。情符丹簡。則玉臺增華。儀德兼崇。音光並茂者乎。然風雅非招愁之具。明慧豈引恨之媒。而朗麗多哀。伊鬱易感。是猶奏清角以來憂。聞雍琴而流涕。豈以風清者難爲懷。而意廣者易於戚也。若夫庭飄風絮。而與恨俱飛。詩詠落花。乃挹紅成淚。蘭摧芳畹。玉折瑤枝。星隕麟亡。珠傷月死。班風罷扇。謝雪消閨。腸似哀猿。魂如啼魄。野棠風碎。虛悲寒食之煙。手刺衣花。徒泣青楓之落。是以聲非隣笛。不異山陽。韻若雨鈴。靡殊蜀道。辭之悲也。非其痛之深乎。乃青綾步障。雅辯猶存。錦字流黃。新詩尙在。靈壽之銘如昨。空篋之賦方裁。而簫聲忽斷。月寒鳳去之樓。石履虛存。雲濕蓮花之嶺。夢繞玉堦。紅心無草。淚餘香徑。斷腸有花。徒使弘農故卷。爰著遺芳之名。臨安舊文。用垂積玉之美。不亦傷哉。夫青州古塚。漫傳東海之銘。邽隴荒碑。空誌埋香之句。莫不影散寒揪。聲銷蔓草。露泣頽宮。煙迷故館。春翻芍藥。已異織錦之花。秋冷梧桐。無復擣衣之月。雲翹易毀。寶瑟難追。若斯衆矣。尙奚云乎。豈若珠輝蕙軸。簧奏瓊函。銀翰流芬。綠芽絢采。無煩金石與碑碣。而兼遙不假。丹青借悲歡而並寫。所云百齡影徂。千載心在。殆非然歟。吾姊宛君。固先大夫之元

女也。明姿秀世。天韻風遐。合體淑靈。散儀朗潤。幼好文藝。長洽縹緗。吹律之對。早自開絃。清風之章。夙明往誦。馨傳桂苑。穎絕芝階。譽溢清閨。聲高華闕。兼以愛敬。夙彰柔嫻。必備聲諧。環珮履協。珩璜家稱。慈孝物化。謙和而更。淵志冰清。逸情雲上。桓少君之高風。絕世王韞秀之識量。過人躬懷士行。跡伴古賢。蘭雪齊資。桂筠同致。是以志存雅素。共忝司隸之名。朗鑒知微。愈重巨源之度。素絲靡玷。赤芾有輝。顯茲休德。並儷嘉聲。乃若書傳伏氏。史繼班昭。塔滿鄭家之草。案盈路澤之蒲。男如八荀。女似三劉。穎藻風飛。驚才玉立。慢卷春風。簾垂夜月。綠苑烏啼。紅窗鸚語。閑消寶篆。姑酌金壘。硯貯瑤瓊。筆開翡翠。蠟燭之吟。競傳佳句。曉粧之什。共播新詩。秦嘉遠宦。寶釵明鏡之書。崔女光容。白雪桃花之詠。韻剪瑤華。詞霏雲露。至於幽緒縈懷。遐思引悶。桂吐數枝。蘭披兩葉。不解臨軒之顏。徒憎春風之笑。張衡四愁。陳思七哀。不待有感。自爾多情。若素女之絃。偏悲漆室之憂。長嘯情旨遙深。固非人所易曉也。旣而蘭香遽遐。綵鸞乍逝。雙珠載隕。二桂繼傾。痛纏心骨。愁疚漸滋。詞悲落葉。涕灑千秋之亭。賦寫傷心。悽惻金陵之恨。重以幼嫠。勞面於殤。轉慈姑崩蹶於磁年。百憂旣罹。五內咸摧。素帳一號。拊膺瀑血。護樹難消。龍膏靡補。月中靈藥。無復不死之方。海外神香。已絕返生之望。嗚呼傷哉。雖慈孝兼成。允符古烈。而風雅頓盡。莫贖人亡。悲夫。葉虞部情雖伉儷。誼勝友生。富貴不累。梅聖俞之爲賢。高情相協。宗

少文之同趣。嘯詠琴觴。唱酬風月。敷翫典文。娛弄書史。方之往紀。有軼前徵。而金鈿忽墜。薰帳已空。痛過安仁。哀逾孫楚。樂天不足。諭其悲。夢得未能。述其感。睠茲遺奩。爰收散帙。勒諸石錄。昭之彤管。翠微殘夢。依然明月梨花。孤館神飛。猶唱傷心園樹。王家蝴蝶。似來舊日之庭。陸氏鶯鶯。欲結他年之塚。薤歌紀傳。咸會一編。可謂觀風似面。聽辭如泣者也。嗟乎。鶯飛故院。花發舊枝。寒梅已落。載詠何人。茉莉飄香。前詩徒在。篋有遺芬。翰留餘采。溘焉一朝。居然萬古。玉女峰高。金精山竅。詎知姑射之魂。化爲瑤草。庶同長慶之卷。價重雞林。竊憫躬丁薄祜。戶祚猖披。烏巷多塵。青箱有蠹。若李元素之孤。而有姊。賈梁道之抱。而聞書。雖如母之愛。情逾楊氏。而燕鬢之牽。不逮李君。嗚呼。傷哉。德幕猶懸。右袂之容未改。葭灰易變。季路之痛焉窮。撫卷興哀。沾纓何已。是以夫人之碣。尙有待於魯公。爰冀大家之文。終永傳於女史。

崇禎丙子寒食日。弟沈自炳君晦撰。

葉夫人遺集序

葉夫人字宛君。余之女弟也。幼而奇慧。識鑒過人。秋月銀河。可方內度。春池琪樹。差擬容儀。支機天巧。班蔡文華。嘗伯仲間。析疑送難。則理趣玄解。遊刃大竅。每多餘裁。既歸虞部。克諧伉儷。適太翁蚤逝。事姑太夫人。獨以孝聞。拮据持家。恭勤自立。寬和御下。人樂春風。是稱禮極中闈。義殊月窟者矣。琴瑟既翕。甫及三旬。蘭薰幽香。盈堦嫩綠。來儀一妙。秀毓五湖。雖震兌分行。而冰心玉韻。雲霞綺互。而文賦蔚如。若劉孝綽。祇得其三。陳太丘。猶慚其四。今合二美。以一門。豈非人中之瑞也哉。其女甥四人。惟季襁褓。孟曰昭齊。仲曰蕙綢。叔曰瓊章。皆美慧英才。幽閒貞淑。居恆廣和。篇章閨範。頓成學圃。精心禪悅。庭闈頗似蓮邦。然祕而不發也。瓊章三四歲。在君庸弟家。授之楚辭。了了能憶。十歲歸母。十二歲工詩。見者膾炙。多傳頌之。十四能奕。十六善琴。清聲超越。冷然山水。兼模畫譜。而落花飛蝶。極其靈巧。於王子敬洛神賦。日臨一過。吾之猶昔。或非昔人。性愛煙霞。潛通梵奧。是以父母鍾愛。呼爲小友。然無恃態。於姊妹兄弟間。更敦倫誼。不喜華飾。玉容明秀。韻致亭亭。慈仁寬厚。固自性植。其亦意生身邪。許字玉峰。張公子立平。韶年十七。催粧禮報。忽爲現疾。維摩出關將臨。竟爾蓮胎託質。臨終略無昏怠。惟枕母臂。

間。星眸炯炯。佛念騰騰。似入定頃。怡然而逝。沒後猶能隨舅新安。句拈紅葉。金鑑曉寒。入夢雖新。芳魂遠報。事亦奇矣。固聚爲非常之情。而別爲非常之慘。木石且與推移。鍾情母子。得無巫峽三更。柔腸寸斷。飲泣天昏。吞聲地裂。而吾妹玉折之繇一也。昭齊具相端好。金輝玉潤。年三歲。便讀長恨歌。不四五遍。卽能朗誦。十三四歲。學爲詩詞。同母步李滄溟。秋日八詠韻。則清新俊逸。儼然一代詩史。德性儉勤。識見超曠。和氣肅容。善調姑妯。尊卑各得其歡心。深有幽閒肅穆之度。書法遒勁。有晉人風致。但歸袁七載。每多動忍。眉案空嗟。熊虺夢杳。心悄悄於鬱境愁鄉。雖歸寧暫寄。母子弟妹。語笑恬怡。正復情矯神傷。無言心痛。但思絕俗逃虛。尋松問石。覺大塊勞生。遽然欲醒。正作瓊章催粧詩罷。而訃音且至。以合璧忽分。彩雲乍散。追魂天谷。奪魄大淵。向日矯矯。遂不能支矣。日誦諸梵筴。以爲常課。未亡之前。幽棲入夢。似在兩山三竺。如來說偈。大士津梁。奚啻數數。然吾妹亦以正法提攜。乃得念佛端坐。瞑目而化。子實黃臺。摘焉再摘。幾許天真。那堪零落。此吾妹玉折之繇二也。藏舟於壑。力負每趨。未及三年。又喪一男。藍田之玉。閨苑之珠。或將嫁而亡。或言歸而殞。或方華而萎。卽阿羅漢隔陰猶迷。具足聰明。情癡豈免。此吾妹玉折者三也。噫。春華正豔。秋月孤圓。洞天纔下。人世無雙。瓊章之變。妹云當場不慮。沒後驚悲者。哀於無哀。其痛在未發時也。不七十日。昭齊物化。妹云始終卜天。形影求起。竟不可

得者。無哀於哀。其痛在未發爲發時也。黯爾魂銷。刻於骨肉。疑無生理。乃愛子方驚。聘媳殉節。三折玉銷。四山珠碎。六月飛霜。日輪子夜。則未生已生之天。合忽前忽後之慘。具人生衆美。極宇宙奇哀。妹之無生者。情耶。性耶。抑有旨矣。蓋吾妹性地光明。根株繁茂。讀其挽女詩。有回首從前都是夢。劬勞恩念等閒銷。又云亦知幻化原非相。未悟真空只有悲之句。定是從果位中現女人身。以說法儆醒世人。不作癡憨之態。則情極而性空也。又吾妹已得根塵灑落。竿木隨身。逢緣作戲。消除餘習。如預流七返海會。六年理脫事圓。當場了了。傍見徒勞。則吾輩爲之親姻眷屬者。於此法上。亦不必生實解也。雖然二鳳沖霄。一龍浴海。搏扶搖而上。彼自各知時節。今者六龍領下。具有驪珠。二鳳威中。霓裳闋采。德星萃聚。猶勝單輪。雙翼惟能。知以珍重。則示滅現儀。元無二相。內侄永楨。卽爲蕙綢玉潤。佳兒佳婦。永效于飛。吾妹下視。可無思凡之操矣。適集遺音。徵余序引。爰述次第。識之末簡。

崇禎丙子八月中秋日。雲棲弟子一行道人。大榮漫題於谷響齋。道人爲王夫人於宛君爲從姊。

午夢堂全集上 目次

鸚吹上

序

五言古詩(四十首)

七言古詩(十九首)

五言律詩(四十九首)

五言律詩(一首)

七言律詩(九十一首)

五言絕句(九十三首)

六言絕句(二百二十六首)

鸚吹下

詩餘(二百九十首)

偈(一首)

擬連珠(十二首)

騷(二首)

賦(三首)

序(一首)

傳(二首)

鸚吹附

祭文

哀辭

祭文・傳

鸚吹集梅花詩(二百首)

愁言

序

五言古詩(四首)

七言古詩(五首)

五言律詩(十一首)

七言律詩(四首)

五言絕句(七首)

七言絕句(六十四首)

詞(四十七首)

補遺(三首)

愁言附

詩(兩題)

文(六首)

返生香

序

五言古詩(六首)

七言古詩(七首)

五言律詩(十二首)

七言律詩(六首)

五言絕句(六首)

七言絕句(五十七首)

偈(一首)

詞(九十首)

返生香附

詩(六題)・文(八題)・行略

鴛鴦夢(劇)

竊聞

續竊聞

鷓鴣吹（午夢堂遺集卷上）

吳江 沈宜修宛君 著

五言古詩（四十首）

寒夜聞雁

霜月澄寒光。紗窗晚風促。攬袂未成眠。香冷淒寒玉。一雁唳長天。哀飛聲斷續。嘹唳喚人愁。百感縈心曲。永夜竹蕭蕭。畫屏孤短燭。憔悴鏡應憐。支離消素束。漫漫殊未央。覺盡雙蛾綠。欲起書短章。難倩雞聲旭。

感懷（和仲韶韻時在茗上）

涼風吹落霞。靜夜松飄露。修竹乍舒簟。遊子天涯暮。羅幌半垂幃。吳綃捲香霧。月色入迴廊。照我愁獨步。開簾覽餘花。思結江淹賦。一水隔河梁。片雲渺無度。欲作斷腸詩。桐葉窺相妬。憶昔畫欄前。飛光皎寒兔。花底醉春風。楚楚輕妍嫵。樹影碧森橫。裙拂瀟湘素。雙袖落香紅。彷彿

佛巫雲吐，別恨夢難從。誰挽江頭渡。風月最無憑。莫向東君訴。高林啼子規。驚喚迷魂寤。望望不勝思。紫燕來庭戶。伯勞自東西。飛鵲還棲故。十六與君婚。非是無媒路。惜別亦常情。流波空淚瀟。陟山采薜薇。自把刀環數。明鏡知我心。臺前照哀悽。

先嚴君棄捐之後音容如昔燧火已周愴焉欲絕賦言志痛

長風勁寒松。繁霜淒夜冽。落日亂山空。流水去隴咽。感念泉下人。悠悠道路別。傷哉已一載。音容隨露滅。哭心不復聞。迴腸空自裂。綠野暮飛煙。寒梅曙驚雪。啼鳥遶白楊。衰草悲荒碣。蒼茫樹色低。徬徨雁聲切。虛堂何寥寥。遙夜堪愁絕。泣下霑衣裳。悽愴玄雲結。

夏初教女學繡有感

憶昔十三餘。倚床初學繡。不解春惱人。惟譜花含蕊。十五弄瓊簫。柳絮吹粘袖。挈伴試鞦韆。芳草花陰逗。十六畫蛾眉。蛾眉春欲瘦。春風二十年。脈脈空長晝。流光幾度新。曉夢還如舊。落盡薔薇花。正是愁時候。

古意

空塔萬籟寂。永夜一燈看。欹枕竟無寐。違情徒自歎。飄風響庭樹。殘月向雕欄。起視明星燦。應知夜未闌。

春月

暖風吹白月。斜影流中房。碧桐舒新砌。篆竹森古牆。遊子河澣隔。陌頭絲柳長。燕飛語簾幕。一一杏花香。芳草薰遲日。春山蹙淡粧。徘徊對庭樹。羅袖隨風翔。願移月邊雲。駐聽我衷腸。寄言天涯人。應同憐素光。

感懷

小池楊柳疏。西風吹禾黍。蟋蟀怨幽戶。高城動悲杵。茱萸冷絳紗。黃花愁不語。桂葉消黛眉。芙蓉落江渚。松風響暮欄。孤燈明秋紵。照我長夜愁。愁懷如縑杼。一絲織一縷。終日成幾緒。試望兼葭色。白露淒湖墅。明月流天空。徘徊自延佇。清漏滴殘更。棲鴻驚夜侶。零華滅青鏡。團扇傷流序。嗟哉處世間。憂愁半相與。

秋懷

天外飛涼颺。忽來襲羅綺。斜日小簾杆。秋到紗窗矣。井上碧梧桐。一葉初飄起。蟬冷白蘋洲。桃李誰相倚。金谷笛聲寒。盈盈斷雙鯉。日暮洞庭波。蒼梧悲帝子。

雪夜

覆天彤雲驟。六霰舞瑤光。飛瓊乘之下。皓皚生夜涼。燈影寂浮綠。寒篝凝不香。殘更催歲

暮百感徒寸傷。愁鏡侵芳鬢。清樽入冷腸。遙碧何漠漠。空蒼更茫茫。吁嗟不能寐。永夜獨徬徨。

庭前花缸中小石

靈石不盈尺。流波遶巖側。奇骨亦天開。宛然層峯削。秋棠落階雲。輕羅亂烟織。荇葉能卷舒。桐影時欹直。竹風吹暮涼。鳳尾翦新色。小壑鎖洞幽。白花粲巒北。獨憐芳草青。不待王孫憶。最惜山桃枝。難倩東君力。

有感

昔日魚玄機。論情非最理。情難寶易求。斯言亦謬矣。世豈少多情。總之皆非是。彼處自多情。此處情如紙。遙聞不能忘。徒勞日進邇。梅妃較玉環。畢竟屬誰美。有情與無情。何以分彼此。觀破如幻化。一切隨流水。

金陵秋夜

促織叫聲怨。頽垣徹夜幽。古牕留月照。寒柏森荒湫。鄉異愁無異。江流恨亦流。閑雲空渺漠。飛影日悠悠。

依依垂柳色。猶是六朝留。景陽何處問。結綺寂無樓。歲月忽云逝。殘花催鬢秋。勞心空慷慨。庭草非忘憂。莫作婦人身。貴賤總之愁。君平何必問。進退不能繇。

角聲吹落日。殘夢下瀟湘。遠寺鐘初歇。寒帷動曉光。薄衾寒怯早。秋扇漫悲涼。攬衣將欲起。推枕恨偏長。徬徨獨惆悵。泣下沾衣裳。

憑檻初臨鏡。猶聞黃鳥聲。隨風度宛轉。恰是故鄉鳴。芳草縈愁緒。天涯處處生。紛紛秋色裏。蕭索古今情。

哭表妹張倩倩

北風吹黃埃。散漫悲蕭索。玉骨堆荒丘。盛年滅幽壑。白楊映青山。華表空遼鶴。流水咽鳴琴。屋梁惟月落。絕世紅顏子。似絮渾漂泊。遊子夢天涯。功名徒怨薄。杜鵑枝上啼。幾度年光惡。織錦泣誰憐。魚書杳川洛。山頭風雨重。化石隨寥廓。膏沐不爲容。夜臺甘寂寞。愁魂遠洞庭。波浪江邊作。燕子語空樓。繡幃悽斷魄。殘日草離離。野煙寒漠漠。歲詩寫斷腸。泉路如何託。總壘舊時遊。言笑恍如昨。痛君君不聞。清風動簾幕。嗟嗟死別離。清淚空彈卻。雲黯日沈沈。高林喧鳥雀。

送仲韶北上(戊辰)

小綠吹雙黛。芳菲映翠樓。鸞緇侵別思。鴛錦恐香篝。行色風塵遠。蕭蕭若素秋。去歲花時節。銜杯南陌頭。今年桃李候。復送遠行舟。楊柳何須問。攀條豈自繇。年年苦攀折。顧影亦堪愁。

垂絲懸落日。遠浦自輕鷗。春妍正無賴。杜若遍汀洲。含情題芍藥。待燕捲簾鉤。靡蕪隨處綠。青鬢不容留。萬仞山橫碧。蒼煙日夜浮。落花徒有感。啼鳥暮庭幽。迴波幾千折。別恨長悠悠。明明天上月。難逐素光流。聊歌送君曲。且作無情遊。

病餘照鏡有感

明月向曉風。夢覺憐君伴。愁裏拭君疏。清光忽塵滿。長歎偶相呵。浮埃拂難散。瘦影不分明。何解人腸斷。

夢君庸

惻惻復惻惻。離恨遯難測。一別七經秋。愁思惟歎息。邇來頻入夢。夢竟何繇得。爾若夢故鄉。故鄉無所憶。我若夢天涯。天涯路未識。總之兩茫然。長夜漫漫黑。悠悠傷我懷。月落青林側。仰望鶴鵠飛。何時振羽翼。

夏日感懷

太山高峨峨。流泉深莫測。荆棘滿道路。青蠅蔽空黑。巧話剪如簧。迎風不知息。爍日草雖披。亂緒愁難織。歲月良悠悠。撫景懷悽惻。浩浩太虛間。營營何所極。

題疎香閣（次長女昭齊韻）

旭日初升。櫻。腫。臙。映。綺。房。梨。花。猶。夢。雨。宿。蝶。半。迷。香。輕。陰。籠。霞。彩。繁。英。低。飄。翔。待。將。紅。袖。色。簾。影。一。時。芳。海。棠。遠。折。取。拂。鏡。試。新。粧。新。粧。方。徐。理。聽。外。弄。鶯。簧。

其二（次伴女意調）

遠碧遶庭色。參差曠日明。竹間翠煙發。竹外雙鳩鳴。徑曲繁枝曷。嫣紅入望盈。博山微一縷。煙浮畫羅生。芳樹清風起。飄飄落霞輕。

其二（次季女瓊章韻）

幾點催花雨。疏疏入畫樓。推簾望遠擊。爛錦盈汀洲。昨夜碧桃樹。凝雲綴不流。朝來庭草色。挹取暗香浮。飛瓊方十五。吹笙未解愁。次第芳菲節。琬琰知未休。

五月（擬李長吉同仲韶及兩女作）

斯螽初動股。艾虎催懸門。欲試釵頭巧。織綬預剪紋。濯枝潤葵紅。幽澗翻蒲綠。楚水碧于雲。擬待浮菰粟。

題扇頭山水

微茫遠岫色。橫碧鎖秋光。懸蘿亘古木。疊嶂摩青蒼。林鳥啼不聞。復徑自逶迤。氤氳草如霧。翠影浮參差。澗水何寂寂。松露凝香滴。長風澄天高。清暉映層壁。落葉墮盈壑。白雲閑悠悠。

日晚無猿嘯。空山千古幽。似有桃源人。煙深久避秦。山花待春發。誰復問漁津。

聽族姑彈琴

草色饒春徑。花光入曉櫺。海棠昨夜雨。枝上半嫣紅。吹香庭院靜。翠捲柳微濛。忽爾至人過。爲我理絲桐。高情曠千古。可與日月同。冰絃乍挑撥。玉指泛宮商。白雪音隨發。歸風引送長。峨峨三峽思。流水何洋洋。林表動清響。雲彩飛悠揚。僊僊青鸞集。低昂敷衆芳。促柱淒古調。參差襲素裳。斜日吟寒松。輕煙霏夕露。拂袖撫金徽。哀思結復澹。再奏彈廣陵。愧乏嵇康賦。庭鳥寂不喧。明月簾前度。冷然解我煩。還恐幽蘭妬。逸韻坐間飄。聽竹鳴蕭蕭。曲罷林花落。餘音遶碧霄。

懷遠

疏簾閑夕照。燕去畫梁虛。芙蓉冷烟渚。慷慨傷離居。秋光渺無際。恍惚何如昨。木落殘霜餘。清風自寥廓。

勞生消白晝。長夜覺愁多。日月恆相送。茫茫奈爾何。涼風傷蟋蟀。寒氣勁梧桐。繁霜淒蕙草。天闊肅高秋。歲序良忽忽。悲哉心悠悠。寄情霄漢間。浩蕩與雲浮。

閑宵月當午。飄然來清風。長河迴橫碧。雲物淡秋空。墮葉縈蛛網。幽蟲泣露紅。秋色正蕭

瑟靜坐思何窮。徘徊獨已矣。勞心自忡忡。長風扇白練。萬里波光融。何如此時恨。流水日江東。
曉起

曉風庭戶靜。涼露迎晨旭。簷柳颺垂絲。鶯聲斷還續。花草撩亂香。幽篁弄新綠。芍藥如含笑。旖旎迴廊曲。薔薇更裊裊。滿架紛紅玉。景色良悠哉。聊以消塵俗。

初夏

春堤水瀾瀾。芳樹春風起。流鶯不住啼。花霧愁無已。晝閣鎖蒼苔。藥欄綴餘綺。日月亘古忙。春華修成萎。擾擾夢中身。何須分惡美。蝴蝶猶翩翩。南華已故紙。今古總茫然。誰非與誰是。翠徑吐新篔。浮生聊爾爾。

贈靈儀師

泛海杯中渡。蓮花鉢裏生。戒香覺了悟。慧炬破無明。談空頑石動。說法雨花輕。貝葉竹間誦。梵音松下聲。塵勞淨洗卻。非相復非營。欲識禪心似。空山朗月清。

顏延之有五君詠暇日戲擬爲之

佳人字倩倩。綽約多娟微。豐旣妍有餘。柔亦弱可擬。巧笑思莊姜。宜鬢羨西子。沈香倚畫欄。獨立誰堪比。春雨泣梨花。華清竟杳矣。(表妹張倩倩)

芙蓉謫仙人。明豔閨房秀。玉質映疏香。修蛾凝遠岫。飛霞紅翩翻。海棠嬌初逗。萬豔搖春光。爛奪天工繡。欣看長卿才。琴向文君奏。（君晦弟夫人周媛）

有妹在深閨。亭亭最妍媸。修韻落輕雲。幽姿含夕露。珠輝曠月流。玉彩迎花度。遲日怨春風。芳草憐微步。可憐景陽宮。蛾眉今再覩。（六妹）

瑯琊王夫人。散朗神超絕。飄然林下風。逸思流迴雪。草聖百杯傳。談空萬緣滅。春暖杏花天。綺綴羅衣額。故知謝家庭。自參太傅哲。（王閨仲夫人）

茗溪鎖飛瓊。盈盈非姓許。端麗逞修妍。芙蓉曠秋渚。洛水賦淩波。天然多付與。吹花落繡床。拾起嬌無語。回首巫峽遙。行雲失湘楚。（戚表妹）

重午悼女

新綠下簾旌。猩紅綻榴萼。萱草助人愁。空喚忘憂錯。綵縷泛蒲觥。事事都作惡。團扇亦依然。餘香鎖空閣。惟有淚花飄。飛染初篔簹。

十月朔日憶亡女

哀鴻語嘹唳。碧蒼淨皎潔。黃花寂無言。似恨千秋別。深鎖一庭幽。慘盡悲秋節。冥漠泉路長。其如歲月瞥。杳杳不返魂。奠酒空陳設。惟有紙錢灰。煙飛寒凜冽。落日羣鳥鳴。西風淒唳咽。

笑語憶生前。美音終斷絕。何堪一寸心。當此千萬折。徬徬靜夜思。殘月燈明滅。

夜夢亡女瓊章

東風夜初回。紗幮寒尚冽。徘徊未成眠。銅壺催漏徹。偶睡夢相逢。花顏逾皎雪。歡極思茫然。離懷竟難說。但知相見歡。忘卻死生別。我問姊安在。汝何不同挈。指向曲房東。靜把書篇閱。握手情正長。恍焉驚夢咽。覺後猶牽衣。殘燈半明滅。欹枕自吞聲。肝腸盡摧折。

偶懷

碧玉分琅玕。香紅競芳紫。日影下重簾。徘徊遍桃李。更有楊柳絲。臨風多旖旎。散剪亂瓊瑤。飛滿雕欄綺。詎知景光遠。世事邈難測。秋容一搖落。倏忽遂凋色。亦知若大夢。欲醉何繇得。歎息懷滄洲。遐想徒鬱抑。夕露濕涼花。疏螢似相識。飄然松下烟。聊爾與相織。

七言古詩（十九首）

秋夜憶君晦弟

涼風飄兮素月明。襄重幃兮步中庭。煙霏霏兮微雲生。樹蒼蒼兮玉露清。目眇眇兮思何極。氣蕭瑟兮傷余情。奄忽兮代序。薰草兮離披。紫燕去兮畫梁寂。素景淒兮寒蟬啼。望星河之

耿耿湖玉漏之遲遲。塞淹留兮夜何其。嗟雁影兮長參差。

暮春十六夜望月有懷

玉樹驚烏光皎皎。疏星數點長河渺。憑高一望暮天空。天空月上青山小。二八蟾光不減前。還同三五鬪嬋娟。班姬雪練重裁扇。李白杯深再泛船。月底徘徊欲斷腸。花飛又復遶迴廊。松風颯颯來庭戶。樹色朦朧拂煙霧。天外孤雲自往還。不傳人恨到關山。關山一片湘江綠。月照波流千萬曲。曲曲湘波不斷流。閨消今古幾人愁。白髮征人邊塞淚。紅顏思婦怨高樓。樓前月落思依依。杏花狼藉柳烟霏。萋萋芳草天涯碧。愁見樓中燕子飛。年年花月祇愁人。愁裏消殘一半春。若教明月長相照。願逐流光遶去塵。

寄仲韶(茗上)

深綠枝頭散香綺。惠風吹入雕欄裏。瑤臺月落畫屏虛。繡戶春光空旖旎。陌上遊絲弄野烟。茗上行人隔錦川。鴛鴦碧沼波初暖。芳草簾櫳色正芊。芊綿草色最無情。偏曠羅裾翡翠輕。斷腸不作迷雲夢。蝴蝶自翻春影動。遲遲煦日不成粧。鏡裏青山遠恨長。掩盡深閨落盡花。春隨飛絮遶天涯。風前楊柳搖空碧。留得鶯聲待到家。昨夜月明清露滴。寒香飄玉難尋覓。愁來不見度浮雲。惟對落花春寂寂。

悲心花落

濕雲不飛花欲落。數枝憔悴。臙脂薄。怨白愁紅香霧空。晝長無奈飄羅幕。處處啼殘杜宇聲。青梅葉底送春行。瀟湘幾陣桃花雨。綠樹青山入望平。裊裊垂楊拖翠線。碧岫霞流飛彩霞。餘霞散綺晚風前。芳草天涯蝶夢邊。公子金鞍嘶落日。佳人紅袖泣啼鵲。啼鵲落日春茫茫。紫檀斜柱十三絃。乍見雲開秦樹色。又看雪舞漢宮烟。漢宮枝上更多情。千丈游絲遶樹迎。薔薇架上遲新月。芍藥闌前度曉鶯。曉鶯啼不歇。夢破關山月。風月暗消殘。鏡裏愁華髮。粧鏡慵窺。雙鬢蓬花開爭似夕陽紅。夕陽千里還同照。花落空隨逝水東。東流逝水日悠悠。流盡閨人一片愁。錦字不傳紅葉恨。燕啣春色入銀鈎。春爲多愁不忍看。可堪春去衆芳殘。風前歷亂吹腸斷。落盡蒼苔淚點丹。寄語春光莫來去。免教長恨倚欄杆。

送仲韶北上(丁卯春)

濟風曠碧寒幃弄。亂鳥呼春花影動。桂葉消殘不耐愁。露桃澀雨猶含夢。霸陵樹色拂行塵。落日青山山外人。夜夜鶉啼簾畔月。絲絲柳吐陌頭春。春風歲歲到人間。試問春光幾日閑。乍見河橋芳草綠。謾將樽酒唱陽關。陽關一曲愁雲起。花落花開逐流水。流水茫茫雲渺渺。征帆處處隨雲遶。妾臨明鏡自堪羞。君向長安覓舊遊。踏遍長安舊遊路。斷魂應問洗粧樓。

早發揚子江有感

渺渺烟光浮水國。茫茫四望天同色。低迷雲樹映帆飛。抹翠遙山相枕側。白鳥蘆洲自往來。迴波千古流難息。人心有恨若流波。卻恨流波洗不得。

秋夜聽雨

鬧風斜雨驚秋素。暮欄蟲語凝玄露。瀾漫江雲合不開。雲光落井寒烟度。羅綺愁生蘭燼消。庭花寂寞夢迢迢。離披蕙草秋容老。冷落芙蓉向夕凋。池上芙蓉怨秋夜。紅粧淚洗愁難瀉。看盡秋螢滅復飛。綠波自遠寒塘下。休憐綠水帶寒流。莫問芙蓉秋夜愁。看取春風楊柳月。何處高懷秉燭遊。

夢驚感懷

清溪靜夜光如霧。月明花底飄香露。邀雲弄月夜光平。平波接岫低雲樹。樹影參差天漢垂。蒼茫烟景碧葳蕤。恍若乘風隨海鶴。縹緲雲波帶月隨。歎然驚夢卻知愁。此身豈復自能繇。夢中不識愁來路。挈伴還回舊日遊。吁嗟醒後夜蟲喧。蕭蕭竹韻悽愁繁。不須更聽天邊雁。殘漏依稀欲斷魂。

庭際有梧桐。二樹枝幹扶疏。垂陰覆碧。忽被狂風所壞。依依不

忍聊以書懷

憶昔畫欄垂蔭映芳叢。繡簾日日蕩春風。黃鸝睨院弄曉色。蝴蝶踰籬遶夕櫳。夕櫳朝幌拂雲行。片片銀床落葉聲。紫簫吹徹鳳凰曲。轆轤綆汲珠璣續。忽驚搖落嗟衰變。月影依依照庭院。寂寞閑庭初燕歸。青青無復還舒卷。松風飄響向簾來。疑是參差葉乍開。紗牕春思晚朦朧。恍若當時翠色籠。檻前苔蘚依然碧。架上薔薇兩處紅。獨憐細草自芊綿。啼鳥空餘落日煙。惟待南薰解幽愠。漫將愁怨寄冰絃。

午日

堤柳垂兮新翠沃。映明霞兮妍楚束。動波紋兮鴛鴦浴。蕩湘簾兮風暗觸。豔丹榴兮吐蕊粟。籠絳紗兮綵絲續。薦冰盤兮蒲切玉。泛瑤觴兮湛芳醑。歌白紵兮絃奏蜀。競龍舟兮歡未足。草煙霏兮斜陽促。楚江深兮流萬曲。

題山水圖

層巒嵯峨倚雲出。參霞蔽霧凌青翠。古樹蒼蒼石徑斜。行人但過無相詰。萬壑風生雲不飛。春來春去只芳菲。山花風裏還如舊。布屋橫橋鎖翠微。虛閣崢嶸迴寂空。摩崖千尺孤寒松。滄洲茫茫但遠岫。日日征帆掛碧峴。

題扇上漢宮秋色圖

金風動兮錦幕涼。翠蓋傾兮消芰裳。井梧飄飄下銀床。桂樹紛紛浮叢香。珠簾捲兮試曉粧。鸞鏡開兮塗嬌黃。攜女伴兮出長廊。搖瓊佩兮鳴鏘鏘。畫羅薄兮揚芬芳。綬帶垂兮颺綺緗。徙倚湖山漫徜徉。落霞散彩綴秋棠。芙蓉水映曲池塘。薛荔風生泣啼螿。橋宛轉兮波央央。荇參差兮蕩鴛鴦。疏枝嫋嫋兮煙蒼蒼。花霧濛濛兮飛夜光。長河澹兮雲微茫。望雙星兮隔河梁。渭溝流波何洋洋。無情紅葉空悠揚。欲題彩筆思更長。玉塔團扇冷蘭房。練光渺渺雁翱翔。白露如珠始凝霜。月明歌吹兮發昭陽。隨風葳蕤兮度清商。寶瑟橫兮徒自張。翠屏掩兮夢瀟湘。

季春壽姑大人

畫屏開處春風曉。千尺游絲風外裊。韶光九十正無涯。森森玉樹庭前繞。錦堂紫氣浮瑤島。阿母瓊卮稱不老。小玉擎來方朔桃。雙成獻上安期棗。絲絲楊柳掃青蛾。片片飛花綴綺羅。水晶簾外雲和奏。玳瑁筵前綵袖多。縹渺羣仙搖雜佩。珊瑚雜佩彩雲過。河陽桃李長含笑。歲歲花前酒色醅。花下板輿自在遊。深紅殘碧映霞流。試聽百囀鶯聲巧。浩蕩春風吹不休。

四時春歌（同三女作）

瑤臺芳氣叢香泄。曉煙織幌絲何及。杏花開爛玉人天。晨光盪帶臙脂濕。垂楊搓綫掛東

風千縷萬縷穿風急。漢鎖隋堤萬種情。柔條漾處新鶯澀。遊絲更裊清晝長。落花舞蝶紛盈集。海棠獨映畫欄前。捲簾忽見泥香入。天涯芳草綠無邊。堪羨韶光盈九十。但嗟此日正芳菲。何事東君欲收拾。

夏

半簷鐵馬癩風起。權葉葵花翻紅紫。藥欄細草錦爛斑。綠野芊綿秀芳芷。珊瑚琅玕干青雲。娟娟蒼鹵蒼芳蕊。鳴鳩呼雨景逾寂。柔絲裊煙浮湘沚。當午沈沈樹影稠。微風時入簾鈎裏。輕綃籠玉素肌涼。畫餘桃篋清如水。庭前窳屨碧瓏惚。芭蕉翠欲嬌冰綺。瑤琴一曲對南薰。日晚清商飛不已。

秋

雙星斜月銀屏度。棹河縹緲珠垂露。淒淒竹塢生涼風。高拂桂枝擷蟾兔。楓洲水碧立芙蓉。嫋嫋亭亭嬌掩嫋。楚天空闊雁來遲。湘浦煙深迷翠羽。澄光入鏡映粧清。芳袖新飄萱花雨。珊瑚蕉發美人衣。小裳婀娜依庭樹。采蓮曲斷空江煙。長見青山遶秋暮。砧聲昨夜經閨愁。玉指泠泠搗紈素。

冬

玉壺丁丁遲漏刻。璇房月冷風淒惻。悠悠天氣紛黃埃。漠漠寒烟捲霧縈。洞庭木落關塞寒。千門雁叫迷水國。忽疑柳絮似春飛。隨風吹散雕欄側。楚山吳山皆皓然。千沙萬渚浮練色。嚴蕤芳樹盡梨花。玉容粉黛淚痕逼。薰籠烘裊博山煙。行拾瓊瑤消酒力。竹外橫斜香乍來。南枝又報春消息。

盆梅

上苑春風剪麗華。繽紛吹入列仙家。不向瑤臺弄清月。卻來綺戶馥輕紗。紗牕拂拂映寒芒。漢宮擅暈掃蛾黃。乍見雜浮新夢覺。曲屏深院紫檀床。梁園日暖雪消初。辭客花間鬪綵書。機中粉素飄香細。鏡裏勻粧色茜餘。玉瘦不知憐紫燕。夜寒飛露濕霞裾。飛露一宵扶綠萼。幽姿綽約驚珠箔。羅衣纏縵月痕低。翠袖漫憑傾繫落。無限芳菲映畫欄。休教狼籍怨春殘。凭高且莫吹橫笛。留取樽前秉燭看。

哭季女瓊章

碧天淒淒雲黯黯。江楓颯颯墜寒烟。寒烟冥漠哀猿嘯。獨對傷心逝水湲。憶爾盈盈日遠。膝。還愁襜結隔重川。何期泉路悲相促。夜雨燈花聽杜鵑。宛轉長凝閣上粧。粧臺餘韻婉清揚。採雲標縛人何在。落盡寒花樹樹霜。姊妹兄弟長號絕。行雁悲鳴哀更裂。頻年蠟炬幾燒殘。杯

酒共傾清漏。徹問天。今日何參商。龜幃相看淚盈頰。巡簷不復笑。疏香飛絮何繇。題白雪。撫恃深閨十七年。幽蘭明月可方妍。閑時階下尋芳草。靜處屏間展素箋。素箋春寫梨花句。錦帳秋吟暮葉蟬。折玉碎珠何太早。返魂無術心空擣。月明猶自小欄杆。舊日音容何處杳。空房夜夜紙牕風。芭蕉獨伴霜天曉。本期灼灼夭桃賦。何意番成歌薤露。恨極江淹亦未聞。哀多庾信難堪訴。烏啼寂寂舊簾櫳。衰草西風同日暮。暮日寒光竹徑微。比來相見夢偏稀。瑤琴彷彿臨風韻。修竹蕭森怨落暉。春草春花爛熳時。青樽空對憶芳姿。秋風秋月愁無語。誰把瑤華寄一枝。幾度相忘錯喚名。幾回耳畔恍聞聲。驚思已是亡人矣。淚眼難乾祇自傾。蒼蒼白日空長歎。渺渺重泉何時旦。霜露淒閨畫簾寒。青缸凝碧篝香斷。梅花開兮香霏霏。梅花飄兮入絳幃。景微茫兮色迷離。風慘淡兮魂披靡。腸寸剪兮何所之。書哀辭兮難伸悲。

五言律詩（四十九首）

早春舟行

水邊平堤綠。花開野陌鮮。風柔初弄柳。草嫩乍分烟。翠袖橫江隔。青蕪遠樹連。蘭舟輕蕩楫。棹破落霞天。

寒食送君晦西歸

春風吹別棹。柳帶拂鵝黃。草細粘堤軟。花輕照陌香。有愁難寄酒。惟淚可沾裳。回首江天渺。殘霞映夕陽。

思仲韶江陰

柳暗行人遠。東風引夢長。啼鴉催曙色。落絮減春光。草亂遲膺棹。花深憶斂粧。偶將紅豆擲。驚起宿鴛鴦。

病起

桐深簾影碧。啼鳥不關情。餘病消殘日。閑愁付落英。雲依深樹沒。草向靜塔生。坐聽西廳竹。蕭蕭翠葆聲。

秋懷

西風吹木葉。蕭索使人悲。水冷秋葭靜。天空夕鷺遲。徘徊花落夜。悵惘月明時。滿目淒涼事。愁應羅帶知。

感懷

忽爾秋風至。蕭條楚客驚。庭階初葉墮。煙樹遠天平。翠壁千迴曲。澄江萬里縈。碧雲離復

合青鳥竟無情。

思君庸

沙磧寒煙路。漁陽紫塞遙。推梨思舊日。夢草憶今朝。遠樹凝秋月。浮雲落暮潮。刀環何日是。莫負昔題橋。

月夜

水鏡懸天出。松濤雜桂風。素光篩亂影。清竊暎芳叢。小簾涼生翠。疏簾夕隱紅。不知明月下。幾處怨香籠。

仲夏別君晦

柳暗江干色。梅花遶笛吹。歸雲催別恨。啼鳥動離思。山映夕陽碧。愁連芳草遲。一行嗟去雁。長自影參差。

悼嫂

斷雲悲水咽。薄日慘煙離。繡帳魂何在。平林花自悲。苔塔痕絕履。鏡匣網生絲。每作還家夢。相逢恍昔時。

庭柏濛清露。猶籠舊日欄。餘香零落盡。舊跡慘悽看。隴樹頻年老。泉臺徹夜寒。吞聲惟此

別揮涕爲君彈。

中秋

光浮餘碧映瑤彩。落輕霓。桂早香含細。桐高葉覆低。涼生小牕北。影轉曲廊西。皎皎清輝逼。棲烏屢夜啼。

重陽

令節三秋晚。茱萸冷絳囊。雁歸湘渚闊。楓送故園涼。酒向杯中綠。花從徑外黃。天涯正搖落。對景倍堪傷。

風雨登高苦。今朝齊色青。繡糕聞賜食。香餌久傳馨。倍識秋宜眺。方知菊有靈。涼天斜月早。松下且消停。

感秋

月向天中小。人驚秋暮悲。玄霜初落候。客夢未歸時。縹緲三湘雁。蕭條雙鬢絲。空餘舊簫管。懶對月明吹。

秋晚野望

野徑掛疏煙。歸鴉遶夕川。江光澄返景。雲色淡高天。蘆荻方蕭瑟。蘼蕪自蔚然。登臨何限

意聊詠晚風前。

除夕懷遠

雪裏梅花吐。樽中柏葉傾。漏隨殘臘盡。春候曉風迎。遠道征衣寄。遙天錦字橫。何堪問芳草。又欲遶塔生。

秋日村居（和仲韶作）

金風乍蕭瑟。共引五齊醪。物候驚薪粟。流光憶饋桃。煙氳橫野闊。日色淡天高。夜靜湘靈怨。秋江浪正滔。

地是柴村僻。門臨荻野開。遠山堪入黛。曲水可浮杯。豔集秋裳色。香分楚佩來。簡書簾不捲。卒歲聊優哉。

一天煙雨靜。三徑菊松分。降澆愁湘水。游汾起漢雲。春秋忽代序。風月總爲羣。試問池塘草。新來夢幾聞。

晝閣西風夕。涼生竹塢邊。素華凝砌冷。倒影入牕鮮。螢杵懸新月。雕弓勁沈天。幽居自灑灑。一枕莞花偏。

聊賦登臨意。抽毫愧大夫。送歸悲遠道。娛覽眺修途。曉日侵幃箔。寒花拂井轆。江皋昨夜

雨秋色滿澄湖。

透案清輝映。瀟湘拂綸看。但逢風月好。莫惜酒樽乾。唳鶴橫霄遠。吟蟬咽夜寒。休悲秋索寞。霜露任漫漫。

黃葉依風下。凭欄思更悠。半庭微雨歇。數縷薄霞休。未許楓林醉。還消蕙草愁。庾公明月在。感古獨登樓。

秋氣森無盡。留雲不掩關。長吟惜往日。一曲志高山。簾逼爐烟細。屏隨畫彩閑。攀枝堪賞。人在碧叢間。

壬申除夜悼兩女

勁風吹斷鬢。寂寞歲窮天。落日照新鬼。傷心送舊年。室連雙總帳。腸斷一詩篇。臘酒澆難醒。寒花淚紙錢。

癸酉元日

寒綠依天曙。青陽信不賒。臘從除夜盡。春向歲朝華。難表千秋恨。徒生萬古嗟。芳魂長漠漠。何處頰椒花。

人日

剪綵腸逾結。傷心景自流。春風纔七日。泉路若干秋。悽斷雁非字。悲看月又鉤。登高一臨眺。四望總堪愁。

元日遇風雨

寂寞燃燈夜。庭梅似去年。不知傷往日。猶自吐新妍。愁緒連昏雨。髮懷入暮天。淚痕同燭炬。悽愴落樽前。

寒食悼兩亡女

年年芳草綠。歲歲春華來。腸斷何繇續。魂遊不復回。雨飛寒食恨。煙鎖晚風哀。庭萼開還落。荒涼舊蘚苔。

重午悼女

菰黍當年事。傷心萬古留。悽悽吳樹月。寂寂楚江流。腸斷絲難續。閨空日盡愁。惟餘舊花草。榮落自春秋。

夢

夢裏分明見。牽衣語更長。曉風吹斷漏。殘月入迴廊。鏡罷臺前照。衣餘架上香。空憐夢中態。宛轉不能忘。

七夕思兩亡女

乞巧年年事。愁懷逾往常。鵲橋填舊約。瓜菓薦新涼。綵纈難穿淚。金針只刺腸。寄言河漢女。休弄巧絲長。

紈扇辭秋早。鸞音夢已休。芙蓉泣露下。蕙草怯螢流。碧樹偏籠恨。纖雲不礙愁。鴛樓望斜漢。新月復如鉤。

痛別三秋恨。難堪對酒杯。風迎蛛網結。月向桂叢開。靈匹凌秋會。芳魂隔夜臺。今宵仍鬪巧。何不一歸來。

未期慘離句。(去年七夕瓊章有未期先慘離之句)思憶去年辭。嗟彼經年別。今爲永世悲。感時徒自歎。驚序遞無知。惟有娟嬋影。流輝入穗幃。

瓊章二週

兩載難尋夢。三生何日逢。斷腸無以續。淚眼只相供。夜月悲空閣。春華怨綺茸。風篁淒歲暮。幽響泣寒松。

淑態宛猶在。冶容久已非。可憐香魄散。卻似斷煙飛。細草孤雲沒。疏林亂鳥歸。不堪回首處。悽愴淚沾衣。

秋雨獨酌遣懷

細雨晚來下。庭梧墜檻楹。曲屏橫燭影。疏幌隔秋聲。濁酒聊自酌。窮愁無可傾。蕭蕭牕外竹。寒吹入幃迎。

病中春暮（甲戌）

不知春已暮。苔徑綴花多。落絮繁朱草。流波繞碧莎。新鶯愁處聽。遲日病中磨。一榻閑書卷。蕭條對薜蘿。

一春常臥病。細草長庭除。好景不須惜。春風自有餘。笋含新籜嫩。月就暮簾疏。遣興慵拈管。呼兒問草書。

臥病（甲戌）

半牕疏雨後。寂寂晚花晴。懶癖消貧况。窮愁薄世情。鳥歸喧夕景。病臥靜浮生。寂聽迴廊下。蕭蕭風竹聲。

病起步欄前小池（甲戌）

池荷圓乍覆。抱病一登臨。小葉藏黃鳥。輕風轉綠陰。茫茫愁極目。脈脈黯驚心。物色催雙鬢。空懷山水音。

秋日病起(甲戌)

病久支離起。琴書滿榻塵。金風初動柳。玉露乍摧蘋。池上秋蟲冷。天邊客雁新。衰顏青鏡在。一照一傷神。

宋玉愁時候。何堪病後身。碧雲飛古木。明月老江蓠。冷葉偏含悴。幽花不厭貧。悲哉無限意。對景只長嚮。

秋夜風雨情懷作惡賦遣淒涼

風雨秋容黯。簷聲響夜幽。孤燈隱虛幌。殘縷冷香牖。濁酒難勝病。貧居豈耐愁。茫茫此宇宙。何必苦營求。

莫歎秋搖落。其如滿屋蒿。不堪繇徑路。常自惜兒曹。搔首問霄漢。愁懷付醉騷。楞伽百八句。業海若爲撈。

並蒂蘭

佳瑞浮香靄。天風惠好音。紫莖開並蒂。綠葉結同心。猗猗清芬遠。青青幽韻深。古來稱獨秀。猶羨楚騷吟。

喜雨

石燕迎雲至。商羊鼓未休。繁花瓣欲滴。細草嫩堪浮。綠樹隨風夕。緗荷帶雨秋。農夫慶苗黍。靈霽正橫流。

五言俳律（一首）

暮春舟行夜泊鷺湖望月

曲堤春灩漾。杜若正芬芳。啼柳鶯猶澀。銜芹燕漸忙。簾移搖綠小。棹舉送青長。溪暗烟將暝。山遙樹欲藏。笠舟漁罷釣。荇渚鳥窺樞。暮景留春色。微波怨夕陽。碧流浮鏡藻。翠墅靜嵐光。掩映桃花醉。參差菜陌香。鐘聲帆澹靄。寺影月青蒼。四野垂霞幔。千家宿霧樞。自堪供眺覽。不必問瀟湘。苒苒餘蕭索。滔滔獨渺茫。偶來湖嶼望。深喜袖衫涼。不盡江山興。空懷詩酒腸。何能借風月。隨意好悠揚。

七言律詩（九十一首）

春日

百勞啼徹草煙肥。晝穀新裁謝女衣。寶鏡春風花欲笑。繡簾明月夢初歸。芙蓉彩鳳窺青鏡。楊柳宮鴉透翠微。自是片雲隨意去。碧苔空見淡煙飛。

暮春十五夜望月

三五嬋娟散彩紋。空庭花落正紛紛。望中新綠侵光冷。檻外浮青入影分。遙憶故園還照屋。黯思往事獨看雲。夜深莫向欄前倚。此際鶉聲不可聞。

懷表妹張倩倩

別後西樓把袂難。相思江上月光寒。共憐每隔星星換。兩處頻驚歲月殘。芳草湖山應寂寞。暮雲樽酒已闌珊。故園春色還如許。攜手同君夢裏看。

哭先嚴君

悲風蕭瑟暮猿愁。一片荒雲暗嶺頭。白日蒼魂不返。黃埃漠漠草長秋。百年薤露生今恨。正月繁霜自古憂。腸斷不堪殘月影。夜深空照碧池幽。

罔極哀圖報難。寸心裂盡淚空彈。長松月響孤山寂。碧杜風凋弱水寒。草澤有蒿悲出入。夜臺無路問平安。乘流縱駕肥泉棹。遊岱容顏不復觀。

春別

簾前殘月五更風。江上征帆掛碧綳。客路片雲隨遠望。鏡中雙鬢歎飛蓬。繁林芳草千山遠。送恨啼鶯萬里同。待約芙蓉秋水綠。莫教黃菊冷煙空。

五日

綠牕桐蔭午風柔。楚客湘江舊恨流。艾葉幾家懸虎佩。綵絲今日渡龍舟。感時懶學菖蒲泛。對景空悲角黍浮。惟有榴花紅照眼。日斜猶自向人愁。

初浴蘭湯小院涼。百花先採艾根香。靈符空帶愁難辟。色縷新添恨更長。綠柳吹煙淒夜月。錦葵含露泣幽篁。可憐正是懸桃日。惆悵天涯獨舉觴。

秋思

颯颯西風秋葉黃。疏桐明月最淒涼。池塘水落驚鴻鷺。山徑煙深隱鳳凰。翠岫霞連湘渚闊。碧雲樹拂塞天長。沈吟立盡蒼苔月。幾葉秋聲幾斷腸。

絡緯啼涼入畫屏。隔窗時見度飛螢。煙波漠漠浮南浦。木葉蕭蕭下洞庭。萬戶寒砧同夕露。一聲新雁滿沙汀。舉頭欲問衡陽信。無奈聲哀不忍聽。

蕭索秋光桂影寒。淒淒珠露澆叢蘭。白蘋江靜芙蓉落。薜荔風生楊柳殘。寒草霜摧悲夢蝶。隴梅書杳怨飛鸞。故人遙隔蒹葭晚。幾度臨風減素紈。

芭蕉石畔帶餘暉。疏影欄杆翠色分。憔悴樽前愁對酒。寂寥簾外倦看雲。蛾眉常向西風盛。縷枕渾消畫帳熏。渺渺平江吹杜若。蒼煙碧霧日氤氳。

庭花含露檻前幽。紅葉隨波自在流。三徑菊催陶令宅。千峰月繞庾公樓。歲華搖落驚遷候。秋意蕭條憶舊遊。望裏江楓今正綠。何年重擬泛輕舟。

水蓼溪邊處處紅。清溪不隔暗愁濃。海棠有意憐秋色。菡萏無言倚暮空。日落猿啼三峽雨。砌寒蛩怨五更風。鄉關極目休回首。楓落吳江泣斷鴻。

鵲鏡容消只自知。碧雲黃葉動離思。閑愁紫袖衫前色。舊恨青春樹上絲。子夜有情新樂府。傷秋多病送歸辭。江頭八月西風起。寥廓天高鳥度遲。

堤上秋煙籠荻花。堤前古木集寒鴉。半簷幽月情何限。一枕淒風夢亦賒。金縷菱裳消素質。水晶闌扇冷輕紗。天涯切莫憑高倚。一望關山咽暮笳。

暮春夜雨

風雨蕭蕭似素秋。挑燈無賴夜屏幽。紅飛自妬桃花薄。綠嫩新添柳葉柔。細草睡驚蝴蝶夢。畫簾聲斷子規愁。春光九十餘多少。寂寞依然付水流。

憶君庸弟

瑟瑟秋風驚雁行。空江寂寂水茫茫。遙思羌笛吹殘月。此際寒光正落霜。夢寄西牕銀燭短。書傳北塞玉關長。望雲遠恨難將與。漂泊何堪慰斷腸。

代仲韶祝雙壽

絳桃齊熟祝長年。蘭蕙芬芳遶砌前。簾捲水晶看舞袖。杯傾玉醴奏繁絃。春濃瑤島花爭笑。日暖芝田草競芊。眉壽欲知稱幾許。碧天滄海兩綿綿。

春遊有感寄贈周姊（族父參議公女）

麥隴新翻小綠柔。隔溪啼鳥弄芳洲。青山晚色花浮影。暮水微風月入流。共羨仙舟遙憶李。最憐顧曲久聞周。吳宮歌舞重回首。樽酒何年續勝遊。（姊有妹適李）

秋夜不寐有感

入秋未幾砌蟲喧。腸斷何須聽峽猿。弄幌餘燈催遠恨。穿牕斜月引愁魂。生涯漠漠渾難問。心事悠悠漫自論。玉露不知庭桂冷。露微盡夜落雲痕。

秋日望仲韶京報不至

西風初冷碧香裾。白首高堂暮倚闌。豈是上林無一雁。故教尺素杳雙魚。此時王粲登樓思。何日秦嘉寄隴書。吹盡白蘋波自綠。松濤桐露暮簾虛。

中秋望月有感

疏星耿耿碧天遙。銀漢浮槎在九霄。漏鼓漫傳更寂寂。村歌時度夜寥寥。素娥桂兔應知

悔遠客專鱸卻已饒。森樹不堪頻顧影。無邊秋色正今宵。

夜靜徘徊遶曲廊。參差桐影照更長。千林縹緲飛寒露。萬里蒼茫落練光。蕙草消烟淒遠峽。明沙縈碧向殘楊。薄羅且耐寒侵袂。欲共嬋娟訴斷腸。

夜深步月時聞季若處歌聲

空塔步月夜何其。歌管聲聞花外吹。露下亂蛩喧砌早。雲中新雁寄書遲。何堪涼夜徒憐我。試問清光爲照誰。自古愁悲萬里客。芙蓉嬌怨對澄漪。

秋懷

紛階秋色正無端。若爲登臨暮倚欄。病骨未消應似沈。愁絲漸看欲垂潘。斷霞錦織歸雲晚。落葉紅餘御水寒。渺渺所思庭桂發。依依簾月又將殘。

元宵

何處笙歌正落梅。飛花入戶繡屏開。華燈照酒飄香轉。明月窺簾撥霧來。欲向玉壺添漏水。莫教銀箭促啣杯。紫姑迎處楊枝袅。摩碯隨花散寶臺。

甲煎沈水麝檀烟。火樹叢中彩袖連。瑤月千樓明鏡滿。疏星數點夜光寒。天家玉漏催銀漢。繡閣佳人醉綺鈿。露濕香塵羅襪冷。不驚曙色曉雲天。

暮春別君晦卽和所貽之韻

細雨烟絲伊笛涼。青梅如豆日初長。新鶯嫩柳嬌春色。畫舫征帆送夕陽。莫歎池塘頻入夢。爲憐芳草獨踟躕。悠悠雲遶千山碧。卻恨天邊參與商。

暮春別去仲夏將來復和前韻

午牕敲翠竹花涼。簾影沈沈晝晝長。萱莢無端驚換葉。麥秋忽已到斜陽。青春啼鴉催沾袖。紅樹飄英放入觴。時序匆匆易遷代。南風寫恨寄宮商。

秋日

輕陰漠漠鎖清秋。簾幕低垂小院幽。紫荇無風隨浪泊。白蘋盡日帶烟浮。庭臯漫自悲搖落。關塞從教作倦遊。黃鳥不知春去久。枝頭猶似喚人愁。

自在輕紅逐水流。無端閒事惱心頭。西風咽盡瓊簫怨。明月空懸錦瑟秋。修竹尙存湘淚點。疏楊猶作楚腰柔。迴腸斷已難堪續。何必哀猿啼不休。

早春

宿雨初消梅信遲。草含烟碧柳含絲。夢中春色驚蝴蝶。鏡裏年光惜子規。芳樹風前容縹緲。歸鴻天際影參差。曉牕莫問春風意。殘綠深紅任意吹。

偶見雙美同兩女作

並采明珠遊漢浦。相攜覽鏡笑雙雙。容將流雪迴紅袖。韻擬吹簫對綠牕。曉帳含情羞漢殿。夕香細語夢吳江。繇來獨立稱傾國。今日千城亦受降。

七夕

寥廓微雲送夕陽。相傳此夜會牛郎。蟾光初照河中景。鵲駕新催水上粧。既到歡娛猶恨否。乍教離別亦悵忙。人間豈少經年隔。莫怨星槎是渺茫。今宵瓜果薦新涼。明日難堪舊七襄。鵲散橋空千古恨。兔寒藥悔九秋長。漫憐人事何常定。豈獨天邊遂莫當。又值班姬悲扇候。雁飛砧石更徬徨。

和仲韶燕中寄韻

古來秋色倍堪嗟。況復天涯歸正賒。明月幾回驚歲晚。林花時落怨年華。巫猿泣嘯三湘斷。塞雁書傳萬里斜。莫把愁心流水急。浮生到處且爲家。

早秋曉起

清露桐陰綴碧莎。朝霞遶帶柳煙醞。早秋天氣愁爲况。暮景人情感易多。歲月頻驚忙裏過。心懷漫向暗中磨。蕭蕭不盡西風起。吹落庭卉奈若何。

霖雨

岑寂汀洲鎖萸房。霏微盡日雨橫塘。愁心不逐寒烟散。浮世空勞客夢長。桂樹山中閑標
緜。菊花籬畔自悠揚。庭臯此際西風冷。秋色紛紛正渺茫。

雨夜書感

蕭索枝頭樹色殘。亂飄梧葉入雕欄。濕雲不度天邊字。冷雨空銷指上彈。漠漠窮愁難自
解。漫漫永夜只長歎。數聲滴瀝秋牕外。獨背銀缸掩映看。

懷張倩倩表妹

叢桂風吹薜荔茵。秋深蘭佩不堪紉。荒涼舊事隨溝葉。荏苒寒光鎖澗蘋。芳草年年徒自
老。愁心歲歲總如新。蒹葭一望蒼波遠。鴛錦何繇贈故人。

季冬二十四夜窮愁煎逼不勝淒感漫然賦此

細雨霏微起暮烟。斷腸衰草正連天。窮陰漠漠催殘景。曠野蕭蕭送去年。愁思畏逢新節
換。驚魂難倩舊時憐。迴看岸柳衝寒意。莫怨梅花落砌前。

紅燭流殘臘夜遙。醉來聊學讀離騷。空林影疊蒼雲積。疏幌寒迎白雪飄。笑傲不禁煙月
老。窮愁難逐歲華消。蕭條自臥袁安室。寥落心期向九霄。

閒居

清燈半偈夜牕中。靜閉疏香映月櫺。起滅幻緣隨幻化。去來非相卽非空。山頭桂落千峰翠。海際蓮浮一葉紅。若問無明何處破。滄波日日自流東。

閑花靜落水流中。玉磬聲清響翠櫺。四大本來非我相。三生休去說真空。高天澹澹凝寒碧。返照悠悠映夕紅。人我若能明夢境。萬緣隨意任西東。

夏日涼風

何處涼颺衣袂侵。未經搖落早驚心。清浮白雪班姬扇。響動青山謝朓吟。竹爲風徐鴛亂語。花隨畫永蝶雙尋。閑來舊事休重省。若到秋風恐不禁。

立秋夜感懷

涼夜悠悠露氣清。暗蟲悽切草間鳴。高林一葉人初去。短夢三更感乍生。自恨迴波千曲遠。空餘殘月半牕明。文園多病悲秋客。搖落西風萬古情。

秋日病餘

小池流水碧潏潏。池上芙蓉映水根。蝴蝶故憐秋草色。荼蘼猶作暮煙春。長天雁度重山闊。壁月庭空墜葉頻。一自當年悲宋後。至今搖落倍傷人。

秋風嫋嫋露淒淒。一抹微雲遠黛低。事去不堪重憶省。愁來無奈可防隄。洞庭渺渺波光冷。木葉搖搖花徑迷。莫聽吟蟬疏柳外。斜陽常在畫欄西。

葉底秋光葉上霜。碧雲千疊靄微茫。清砧明月催寒近。斜漢橫波傍曉涼。病臥怯聞驚鳥語。愁懷常抱惜秋香。何堪一望多蕭瑟。花竹蕭蕭遠辟牆。

哭長女昭齊

楚辭云。悲莫悲兮生別離。況於死別。更可知矣。死別異慘。矧又相繼耶。余遭三女之變。哀莫能伸。豈意七十日間。又如此禍。何昊天不仁。至斯荼毒也。昔年嶺表。尙且牽衣。今日岱魂。能無銷骨。階前細草。空自芳菲。檻外名花。徒然旖旎。游絲白日。淚與俱飛。唳雁清宵。腸隨共斷。閑雲無意。難覓遺踪。明月多情。還窺空閣。前三女亡時。因其婚期在邇。日夕倥傯。又生平未曾經此。意中實無慮。直待亡後。驚悼悲駭。不知所出。悔云晚矣。故長女臥病兩月之內。余爲百計營求。日禱竺乾。慈悲莫救。遍尋鴻術。參朮無靈。終於永別。嗚呼痛哉。余亦知情緣有限。恩愛必離。奈俗念未銷。填膺難遏。聊草數言。以志痛云爾。

號風凜冽振霜條。爲爾泉遊鶴駕遼。落日荒荒淒碧漢。斷雲漠漠恨蒼霄。連摧玉樹辭秋早。並擊明珠墜海遙。回首從前都是夢。劬勞思念等閑消。

二十三年是妄真。行踪邈逸隔仙塵。昨宵猶作閨中友。今日難尋地下人。每感生離多慘切。豈能死別少酸辛。黃梁一枕何時覺。覺悟生前定有因。

此別相逢無再期。龍鍾雙袖淚痕滋。三聲猿哭江山裂。午夜鶻啼天地悲。晝闌惟餘書滿架。藥欄空見露分蕤。堪憐春到芳菲節。手種名花知爲誰。

東風吹不到泉臺。姊妹長眠甚日開。微雨池塘春索寞。暮雲烟樹影徘徊。半生祇與愁爲伴。七載嘗從悶裏催。赴唁歸寧傷竟歿。可堪哀處更添哀。

夢裏難追往日歡。疏桐淒影曉風酸。鏡中人去粧臺悄。爐內香消錦帳寒。雨細簾前春寂寂。月明院落夜漫漫。梨花開後還知否。留得詩篇不忍看。

夜深寒月照幽魂。風景蕭然靜掩門。剪燭豈能同再話。簡書何得更重論。曲房小檻音容絕。彤管芸箋手澤存。無限荒涼悲滿目。蒼蒼愁結草烟昏。

身前事業總休休。死後流光徹夜幽。欲買青山難遂志。故教綠髮漫成愁。鳥啼枝上新花發。日照天中淑景浮。獨有痛腸同逝水。潺湲嗚咽兩悠悠。

笑語閑評繡閣中。于今相憶信誰通。難尋靈草招魂返。獨剩菱花閉影空。吹恨清風偏颯沓。照愁明月最朦朧。可憐紫燕啣泥候。不復簾前賦落紅。

欄外霏微滿院香。繽紛麗涼競含芳。千花盡逐年華轉。雙玉偏埋春夜長。地下應無新歲月。人間空自老星霜。燕吟絮句俱何在。哭向靈几奠酒漿。藏衣篋內付誰披。賣取錢爲供佛資。汝去灑然多慷慨。我今痛極更迷癡。亦知幻化原非相。未悟真空只有悲。但願三生靈不昧。相逢一笑葛川時。

夜坐憶亡女

臺榭嫣紅半吐嬌。藏蕤景色遍春苔。梅花落粉愁新積。楊柳垂絲夢舊遙。酒後殘燈人寂寂。夜深寒雨竹蕭蕭。清明芳草依然綠。魂斷東風何處招。

亡女瓊章週年

觸景傷心萬事悲。悠悠生死隔年期。眼枯淚盡流清血。腸斷情還倍亂絲。浪影雲歸何處問。無蹤夢去總難追。搖搖虛幌靈安在。侍女添香知不知。

魂銷佩冷一秋長。蕭瑟堤邊盡白楊。竹裏風光如舊日。林間寒色帶新霜。絲來百歲終相別。其奈期年增慘傷。憑仗如來施慧劍。惜根斬斷赴慈航。

蕙萎蘭凋長蔓蘿。空驚歲月恨相磨。芭蕉灑泣憐香玉。楊柳搖愁拂綺羅。一枕仙遊無日返。九霄雲駕幾時過。蓬萊弱水呼天遠。極目烟波奈若何。

玉質花顏總惘然。幾迴音韻况當年。淒心莫問刀常剪。遙夜何堪骨自煎。雁唳一聲寒月落。楓飄萬壑暮雲連。江淹難寫千秋恨。惟叩華香向佛前。

癸酉除夕感悼

庭樹吟風歲暮天。蒼茫落日起重煙。紙牕無分消貧福。石硯常閑爲俗纏。柏葉杯中傷往日。梅花影裏憶當年。眼前流景頻遷謝。愁鬢蕭蕭自黯然。

疏蕊凝香殘臘天。荒扉爆竹散青煙。邨童共樂新正好。總帳長將舊恨纏。雪意欲消雲拂霧。花光驚送柳催年。而今往事徒悲感。惟對春風獨愴然。

甲戌元日同前韻

淑氣催開曙色天。江干夜雨溼朝煙。春絲漸借輕風展。藥蘚還繁弱蔓纏。三載芳魂空在月。雙埋玉骨不知年。綺牕誰試椒花管。華勝屠蘇更杳然。

寒雨連雲歸雁天。翠綿將上柳條煙。流光瞬息古誰在。浮世虛名人自纏。昨夜燈前成隔歲。今朝鏡裏又新年。漫憐花事芳菲節。吹遍春風是惘然。

人日

纓金綵剪勝華天。宮額猶傳五出烟。素粉飄殘芸砌懶。紅香吹破絲纒。逢春把酒憐人

日對景題詩又一年。閑看落花空歎息。不禁淚眼自紛然。

立春

秦地遙傳太史天。雲翹歌舞動輕烟。春光已逐青幡轉。綵燕新看翠羽纏。弓月上弦初拜野。仙萸八葉始驚年。鬢容每向風前改。愁緒年年只宛然。

對雪憶亡女

瓊華寂寂鎖瑤天。玉灑飛塵舞亂烟。風動梨花旋細遶。枝繁蝶粉綴盈纏。悽懷寥落難尋句。幽意蕭條莫問年。一任簾前飄柳絮。因風銀管已茫然。

元夕

縹緲星河不夜天。千門燈火接雲烟。遙憐幾處笙歌擁。自歎今宵病纏。桂葉含愁還夜夜。楊枝掛影似年年。可堪人事多惆悵。美景良辰獨儼然。

早春

獻歲悠悠白日天。冰銷綠水漸籠煙。嘗嗟人世無歡境。獨對窳愁石悶纏。病裏流光消九十。夢中春色過衰年。落梅庭院吹江笛。花落花開倍慘然。

茫茫景色奈何天。萬古消沈一縷煙。玉樹至今青蕊稿。金芝徒有白藤纏。鳥啼花外猶憐

日。雲掃峰前不記年。焉得一丘叢桂裏。泠泠流水自悠然。

仲春次女蕙綢歸寧悲憶亡女昭齊瓊章

蕙蕤芳草杏花天。春半啼鵲怨夕煙。忽見歸寧歡意愜。逾悲泉下痛心纏。去牕有淚供殘簡。繡閣無人對昔年。莫向樽前重剪燭。相看腸斷各悽然。

清明

禁火家家寒食天。梨花吹雪柳吹煙。支離已是春相負。蕭瑟無勞病更纏。新月有情還照夜。落英誰解惜流年。幽蘭怨絕芳叢裏。回首東風竟渺然。

重午日適鹿城人至感懷賦此

梅雨端陽舊楚天。青青竹塢起新煙。當時正恨絲難續。今日何須綵更纏。總有蒲香徒泛酒。還憐菰黍枉頻年。榴花不似梅花使。空遞音塵付悵然。

綠陰寂寂午雲天。靜對疏簾撥篆烟。愁思那禁春去遠。游絲猶向樹爭纏。桐花檻外垂斜景。鶯語枝頭怨往年。眉黛獨餘萱草色。臨風惟有淚潸然。

重陽夜步月漫成

木落重陽寥廓天。徘徊斜月澹飛烟。嘹嘹雁度數聲斷。漠漠山橫幾處連。白露庭空秋寂

寒。黃花影瘦夜嬋娟。更闌愁聽寒蟬語。燭炬遙遙永似年。

秋夜有感

玉露凝珠濕翠微。愁隨寒吹入羅幃。白鷗不盡忘機下。紫雁應知帶淚飛。漏促半牕殘影在。夢迴一枕斷魂非。何堪蕭瑟江楓冷。碎把臙脂剪夕霏。

靜夜

夜靜頻驚竹葉聲。遙看秋色在江城。閑宵清漏同思永。明月疏星與夢平。團扇鵲辭羅袖裊。卷言螢入羽釵橫。憂愁兩字休重寫。滿紙何能得盡情。

貧居贈仲詔

鶴鳴雨埵亂煙飛。苦徑蒼茫落翠微。病久所須憐藥乏。缺彈空自歎魚稀。秦庭不爲貂裘敝。燕市何關駿骨非。獻賦金門曾已遇。對君依舊泣牛衣。

寒夜感懷

黃葉吹殘透竹扉。籬邊景色冷依依。柔腸每欲臨風斷。蓬鬢誰憐向日飛。半夜燈花空自落。一生心事總成違。樽前徒有添惆悵。俯首難禁淚滿衣。

月夜病中

無語紗牕對月明。蕭蕭風竹似秋聲。心慵不耐愛旋擾。病怯難禁夢復驚。舊事已隨流水去。新愁時逐亂雲生。徘徊每自挑燈立。長歎能消幾許情。

感懷和仲韶韻

薰濃烟草鳥聲多。撩亂春光竟若何。貧徹那堪侵病鬼。詩成每歎作文魔。乍晴小院紅枝亞。半雨垂楊綠影婆。落日亭亭愁不語。暮山遙蹙映青螺。

呈泐大師

碌碌浮沉無息機。生涯回首總云非。劬勞未報腸空斷。兒女相牽淚暗揮。幻境亦知難解脫。虛花不定更依違。迷途仰望垂哀憫。願指慈航鑒所祈。

夏夜不寐憶亡兒

遙夜漫漫集百端。挑燈起坐獨長歎。閒庭寂盡蛙喧草。修竹深遮雨入欄。灰盡寸心傷不返。泣殘雙眼淚空彈。九天邈也渾難問。摧折叢蘭玉樹寒。

七夕病中作（乙亥以下三首俱絕筆也）

疏雨庭皋翠影流。迴廊寂寂鳥聲幽。江干水泛隨堤遠。隴首雲飛落日浮。病肺只堪高枕臥。悲秋那假斷猿愁。天邊靈匹年年會。試問何時卻是休。

病中早秋

景光蕭瑟又逢秋。澹蕩叢花浥露浮。夢裏幻身消未盡。愁中多病幾時休。白雲隨意天邊遠。桂樹空懷山徑幽。落日蟬聲偏聒耳。一簾松影暫忘憂。

貧病

貧病繇來不可當。可憐貧病兩相傷。蕭條病怯西風冷。搖落貧消秋日長。病臥家寒捱歲月。貧無客至少匆忙。病魔欲倩詩魂謝。貧鬼何年卻遠方。

五言絕句（九十三首）

秋閨

滿庭秋色晚。明月爲誰來。翡翠閑雙帶。低鬟彈燕釵。
秋去雁聲殘。愁對黃花冷。腸斷倩誰憐。霜月飛寒影。

月夜偶成（迴文）

風清冷露白。月皎映空庭。桐井淒殘夜。斷鴻哀遠汀。

舟行晚歸

江靜罷漁釣。烟深夕鳥愁。樹高連暝色。野艇渡寒流。

對月憶表妹張倩倩

別夢隨流水。愁心忽自飛。斷腸千里月。垂柳若依依。
尺素沈青鳥。吳山夜月空。兼葭江上杳。何日舊遊同。

舟行卽事

天低平樹晚。野色共蒼蒼。遠火漁舟泊。寒烟促棹忙。
暮雁汀洲落。空江月小浮。波光蕩寒影。驚浪起沙鷗。

對鏡

徘徊羞對爾。瘦盡獨君憐。憔悴還相共。愁看明月前。

題屏上美人

蒼渚晴波渺。春條憶遠人。東風吹競綠。萬縷爲誰春。
紫燕啣春色。羅裙草拂烟。依依昨夜夢。伫立杏花邊。
無語芭蕉下。輕羅不耐秋。低鬟倚玉腕。團扇若知愁。
月色侵桐影。燈寒玉漏移。侍兒猶睡穩。聊自理殘棋。

挈伴花陰晚。吹簫弄夕涼。穠香飄桂粟。白露濕衣裳。
梅吐庭前玉。輕搖碧袖低。一枝春在手。翹首隴雲迷。

有感

梅雨正連綿。悲雲濕遠天。桐花開復落。別語竟茫然。
幾曲亂山橫。玉京難數程。何須勞目斷。有夢在華清。

偶題

微雲河漢清。小扇畫羅輕。綠樹蟬初歇。風簷鐵弄聲。
秦箏鶯語清。明月晚風輕。紫袖嬌春色。新歌按曲聲。
芙蓉秋水清。拂袖翠煙輕。曲沼橫欄小。梧桐一葉聲。
楊柳嫋風清。飛飛燕語輕。愁含雙黛蹙。花落兩無聲。

六妹照鏡口贈

星眸夢乍舒。宛轉看不足。一笑繞春風。含情低黛綠。

月夜舟行

漁火江村晚。秋聲處處驚。澄江棹明月。寒影落青萍。

微雲淡天際。平野映帆低。樹遠蒼茫碧。烟光去路迷。
遙天飛寶鏡。共看素娥秋。寂寂空江色。長隨雲影流。

秋夜步月（連環）

疏楊凋秋霜。月影皎迴廊。空翠遙橫漢。蟪蛄淒夜涼。
夜涼風蕭蕭。鸞聲咽紫簫。何處飛瓊下。遙看彩霧飄。
霧飄叢桂冷。雲幕護嬋娟。秋色銀床滿。凭欄霏暮烟。
暮烟迷遠樹。新雁一聲過。潮向寒江落。清光帶綠波。
綠波愁渺渺。鏡展蟾光小。雲碧露清流。風動驚棲鳥。
棲鳥鳴疏葉。簾光畫閣幽。秋螢飛寂寂。銀篋夜悠悠。
悠悠松下露。葱翠濕芳蕤。數朵蘭花葉。清香滿綺楣。
綺楣一葉墜。羅幌風泠泠。莫作關山夢。天涯盡綠萍。
綠萍生河梁。蕭蕭雁南翔。雲間錦字斷。殘月掛疏楊。

秋閨（迴文）

秋暮愁行客。日斜飛柳煙。流雲歸遠岫。薄霧淡高天。

花庭啼鳥亂。疊恨鎖山眉。霞落映寒渚。蝶飛驚墮枝。
鈎簾映皎月。永夜簡琅篇。幽徑竹花露。石寒縈碧錢。
疏雨滴高樹。細風飄暮烟。初聞獨雁過。木落自年年。

寒夜

井梧斜月掛。殘漏不禁寒。獨倚聽雞曉。星飛桂露薄。

除夕

臘剩梅邊雪。春含草上烟。椒花欲擬頌。拂管候新年。

元日

柏葉杯中泛。門宜金字新。輕黃將上柳。欲惱翠樓人。

梧桐怨(前有古風一首未盡所懷復賦此三絕)

一庭清露濕。數載綠陰空。遲日猶憐影。啼鴉怨曉風。
月高春影薄。遷候不知秋。總有臨風句。難憑葉上浮。
歲月相依久。依依故不禁。斷煙金井冷。聲咽鳳凰琴。

楊花

散漫天涯去。風前亂若斜。傷心無限恨。欲寄此飛花。

螢

迎風高復下。映葉滅還明。隔幌時流影。臨書更有情。

感懷

明月照古道。西風吹露草。悠悠千里心。夢落寒雞早。
悲哉秋去矣。何處著愁多。獨有清宵月。流光映綺羅。
簷前滴瀝雨。牕前明滅燈。幽懷獨耿耿。良夜竟何憑。
黃花愁不語。寒雁自嘹嘹。堪笑疏楊柳。還垂舊日腰。
簾外井梧飄。簾內迴腸搗。一葉一聲愁。葉盡愁難掃。
爛熳隔江花。無機何繇拗。蛛網不憐絲。猶弄風前巧。
露濃不作雨。細草自留春。昨夜庭花落。猶憐夢裏身。
何處搗衣聲。吹入羅幃裏。一片杵砧愁。憑風吹不起。
夜夜蛩催織。機中不成疋。縷縷博山煙。何能合爲一。
堤邊楊柳疏。堤下霜華冷。無奈猛西風。間愁吹不省。

池上芙蓉落。秋容鏡裏凋。回看餘草碧。腸斷不禁饒。
惆別非我事。愁魂徒自消。欲將無限意。寄與往來潮。
有淚常彈卻。非關爲濕衣。漫看芳草綠。隨處自芳菲。
亂影篩風竹。秋濤隔暮幃。休言應有恨。何與落花時。
江曲飛雲遶。寒花隔渚香。風吹桃李候。應憶遠山長。

春半憶弟

鷓鴣啼日暮。春草半含芳。池水悠然綠。年華只暗傷。

偶成

春鳥啼不絕。春風吹不休。無端簾外影。又過粉牆頭。

有感

西風吹木葉。井上冷梧桐。月皎長天碧。哀鴻唳遠空。
少婦紅樓怨。征人紫塞愁。雲中音信杳。明月自含秋。
幽意何蕭瑟。金風悲思多。不堪搖落候。江水獨澄波。

愁

粧前常對鏡。清夜與君同。賴得深相契。消磨歲月中。
秋鶯枝上語。宛轉更清新。無奈西風冷。銷牕愁絕人。

夏日卽事

細雨嬾庭綠。桐花落檻前。垂簾聽鳥語。沈水博山煙。

夏夜

密葉藏鶯小。新荷覆水圓。微雲閒縹緲。愁思不相傳。
皎月逗桐影。輕風拂簟涼。深閨花落晚。羅袖惹餘香。
河梁一日別。常憶九秋心。暮霞飛已盡。留恨泣花深。
獨坐幽牕悄。殘燈照夜闌。流螢如有意。隔幌影珊瑚。
雨向塔前滴。愁從靜夜多。聊傾殘茗飲。無可奈愁何。
最是冬缸永。今宵勝似冬。江淹雖有恨。畢竟淺于儂。

秋日

蕭瑟庭前樹。蛩聲永夜哀。愁心已無限。何必又秋來。
炎氣倏已去。涼風初入欄。休嗟團扇冷。遙夜正漫漫。

曉起秋無賴。蕭森竹塢幽。薇花猶吐豔。渾是不知愁。
滿徑秋花發。碧雲天際遙。芙蓉池上老。梧葉露中飄。
漫天將作雨。一縷薄涼生。浮碧渾堪摘。閒花風嬾輕。
折取秋棠花。復把叢蘭摘。香豔共余愁。三絕應無敵。
一夜簾外風。小池蘋水滿。欲去採蘋花。蘋葉風吹斷。
望斷月華明。久立空延伫。欲訴臨風愁。沈吟竟無語。

昭齊二週殘寒逼歲冷日無光腸消心碎咽不成泣忽又張倩

走使通候益助悲酸聊書短韻以志痛懷

淒風振枯條。淚落隨風漉。欲擬招魂辭。腸裂難成句。
彼蒼但悠悠。悲來難以曷。處世樂境無。徒爲歲月促。
拂卻几上塵。小弟焚香待。靈衣自飄飄。靈魂在不在。
今古多茫然。日月空相代。憶爾長逝時。倏焉已二載。
猿嘯杜鵑哀。斷腸千古歎。似余腸已無。何處堪爲斷。
痛爾正傷心。愁雲結黯澹。又值青鳥來。傷心更增倍。

庭梅已吐白。姊妹來看否。想爾不傷離。徑年信無有。
新植塔前樹。新開塔下路。風月可坐談。如何不迴顧。
衰草漫離離。荒煙淒斷魄。泣向西風前。難消心上惡。
空把一泥丸。何以填滄海。愛極與情深。總是生前罪。

六言絕(五首)

薄暮舟行惠山

落日半江煙。醉飛霞兩岸。山橫征帆過。盡水闊。塔影遙掛雲平。

秋竹

素玉幽輝澹白。淚痕猶憶湘君。曲斷鳳樓脈脈。一庭秋碧紛紛。

秋晚

晚翠涼生小徑。殘陽紅繞疏枝。煙月半庭清靄。井梧一葉飄時。

紫薇

綺閣風標獨占。仙卉香吐參差。巧剪薰風豔色。更看秋日繁枝。

暮雨似添華彩。炎氛不洗臙脂。九十芳菲未已。還同桂影爭粧。

七言絕句（二百二十六首）

春思

陌頭楊柳綠參差。低拂行人映酒卮。日暮鷓鴣啼更切。那堪芳草盡成絲。
送送行人賦別離。朝來樓上望青驪。海棠開到清明候。搔首踟躕幾自持。
小院輕寒入翠幃。薄羅猶怯晚風吹。重簾好護梨花月。莫使香魂怨落蕪。
桃李東風競豔姿。青山極目淚燕支。斜陽只送黃昏近。愁向閒庭掩翠眉。
花落花開總是悲。漸看紅日到茶糜。愁情不爲閒風月。落得新來減素肌。
榆莢飄殘蹙桂眉。紅英落處鏡愁窺。絮飛莫怨春歸早。爛漫鶯花知屬誰。
數盡歸鴉暮景遲。曲欄凭暖尙慵移。碧天片片飛雲起。裁作蘇家錦上詩。
舊恨新愁付若知。綠楊枝上問黃鸝。不關心事渾惆悵。一段傷情對碧漪。
月到紗窗照影垂。無端忽忽悶相隨。憐儂惟有庭前樹。夜夜枝頭喚子規。
新綠連波漲曲池。藥欄花露碧煙滋。沿階俱種忘憂草。畢竟忘憂是幾時。

感舊

平橋綠野麥花新。草色含煙遶路陳。人事黯然隨逝水。淚彈餘恨滴江蘋。
茫茫古道共斜暉。啼亂鶯聲柳葉肥。空有新辭悲舊事。晚雲收拾滿船歸。

君晦新婚

晴花風滿簇香塵。玉樹流鶯畫閣春。彩鳳不須憐並跨。芙蓉城裏舊時人。
桃李春濃蝶粉黃。雙蛾可似舊時粧。頻年不解東風夢。羅綺新含苴蔻香。
朝來並蒂一枝紅。吹遍東風黛麝濃。莫笑休文腰更細。繡牕春色正無窮。

憶仲韶金陵

秋聲一片度千門。雲渚依稀欲斷魂。吹盡西風桃葉渡。小牕新月又黃昏。
平碧森陰滿院涼。乍風乍雨似瀟湘。相思欲寄秋江水。採得菱花照斷腸。
離歌一闋去難留。桂影秦淮幾樹愁。惆悵彩鸞飛不到。半江漁笛晚登樓。
繡帳香殘懶更熏。無情秋色亂紛紛。風烟隔斷人千里。一夜砧聲幾處聞。

題美人圖

薄薄羅衫宮樣新。梨花裙映碧苔茵。顰眉盡日思何事。宛轉秋波不溜人。

鴛鴦沙暖綠搖波。團扇徘徊自綺羅。一樹薇花人寂寞。盡將幽恨付煙蘿。含嬌不語倩誰憐。白雪無心綠綺絃。侍兒那解愁如許。日傍桐陰炷碧煙。
看雪

兔園臺上散瓊葩。幾陣迴風轉復斜。拂草乍疑春蝶舞。夜寒深處伴梅花。班姬裁就扇頭輕。踏遍隋堤柳絮繁。一曲琴心千里月。隨風飄作玉關情。
贈文然姪新婚

鵲使銀河乍駕橋。巫山十二彩雲邀。漢宮一樹桃花雨。青雀啣春下碧宵。淚染紅香濕絳綃。珊瑚簇透珮聲遙。最憐今夜笙歌處。愁黛含嬌整翠翹。扇隱亭亭玉步搖。兩行銀燭醉紅綃。合歡枝上花開後。一夜東風到柳條。拂鏡春山學淡描。羞郎猶自怯郎嬌。從今莫歎標梅晚。吹徹秦樓紫玉簫。
春日

紅雨飄殘樹樹春。江山無限別離新。子規有淚空啼月。不向天涯喚遠人。春到庭花第幾枝。紅題流水怨芳時。隋家堤上休回首。月掛垂楊萬縷絲。餘花落處碧苔春。消盡東風夢裏身。閒折海棠偷照水。護簪雲髻可宜人。

雨過飛花撲短牆。淚彈蕉葉剪柔腸。玉盆素手邀明月。隔浦風來荷葉香。
鶯聲啼歇繡簾開。明月隨雲入楚臺。鏡裏新蛾春草碧。片霞歸去蝶飛來。
曉色烟消露未乾。桐花滿院落雕欄。綠牕自試蘭亭草。風到龍香樹影寒。
小庭花影弄春閒。分得巫雲拂露鬢。昨夜碧桃初著雨。侍兒先貯畫屏間。
疏簾瀟灑映青門。翠色雲濛竹徑昏。十二畫樓初月滿。鳳簫聲裏怨離魂。
綽約羅衣薄霧生。乍晴猶覺曉寒輕。杜鵑莫向枝頭喚。留取梨花待月明。
柳色青青罨畫樓。燕交飛處曉紅稠。東風不展丁香結。消得春光幾許愁。
長憶春江泛畫舸。片帆雲影渡煙波。青山日暮藤蘿遠。綠樹惟餘夕照多。

月夜

楓林紅葉正秋宵。半榻幽魂伴寂寥。滿地苔陰簾不捲。月明何處鳳凰橋。
秦宮雲斷楚山迷。鵲鏡光寒浸碧漪。莫怪月圓偏惹恨。月中人正斷腸時。
團團紈扇散清輝。蟾兔瑤光入翠幃。幾遍添香消寂寞。疏牕螢火夜深飛。
芙蓉煙冷伴棲鴉。香霧飄紅兩岸斜。吹徹玉簫花底月。漫憑飛去遶天涯。
當年竊藥路茫茫。銀篋秋生蕙草涼。玉鬢雲鬢應悔否。桂枝消翠落寒香。

青山一點望中看。八月蘋風客棹寒。夜半瀟湘新雁落。孤帆潮水自漫漫。

仲韶往苕上別時風雨淒人天。將暝矣。舟歸寄絕句五首依韻。

次答當臨歧之淚耳

離亭樹色映長征。渺渺煙波送去程。腸斷只憑千里夢。亂山遮隔更無情。
愁添風雨亂紛紛。南浦空瞻日暮雲。蝴蝶肯憐春思黯。應尋芳草去隨君。
河橋楊柳漫依然。萬縷垂絲兩岸牽。待拂素箋憑燕足。斷風吹不到君前。
蓮壺催漏自消魂。畫枕銀屏夜色昏。蕭索半春愁裏過。一天風雨盡啼痕。

春日感別

風吹柳葉遠山顰。紫燕飛殘樹底春。莫問海棠零落盡。眼前誰是看花人。
事事堪悲不待秋。鶯聲未喚淚先流。東風若解人腸斷。願轉光風作石尤。

仲春寄表妹張倩倩

滿目愁看落日煙。歸雲空自託魚箋。深情別後知多少。試向花前聽杜鵑。
湖外青山別路長。閒題舊事盡堪傷。故園明月樓前柳。回首春風各斷腸。

宮怨

雨露年年何日霑。昭陽歌吹妾愁添。近來縷帶渾消盡。不爲宮中舞態纖。
金枕消殘舊日香。蛾眉月夜恨偏長。經年不作羊車夢。惟對東風憶上陽。

七夕

蕙草含煙桂影浮。穿鍼樓上綺羅秋。桐陰寂寂飛螢度。銀漢遙憐會女牛。
雲母屏風映水晶。琅玕碧樹晚涼生。相逢莫話經年事。只怨重傷離別情。
微雲斜月澹河梁。白露無聲濕芰裳。鵲駕乍歸雞又早。玉壺偏惜一宵長。

早春

陌上垂楊已半芽。小庭草色乍舒煙。斷腸祇自憐明鏡。簾外東風又一年。

偶成

香冷燭殘花自落。畫廊寂寂閒垂幕。滿階寒影碧苔橫。一聲塞雁寒漠漠。

無題

風前楊柳漫誇春。未必纖腰似楚人。斜日畫欄雙燕子。又將春意入眉新。

甲子仲韶秋試金陵

桃葉秦淮幾度秋。離魂長自繫孤舟。而今莫再辜秋色。休使還教妾面羞。

感秋

西風日暮故園愁。夢裏空登王粲樓。去鶴山頭松寂寂。亂雲飛盡野燕浮。
露冷蘋洲秋葉紅。雁橫北斗落江楓。月明池上疏楊柳。寂寞芙蓉泣夜蟲。
橫笛江干起亂鴉。萍流斷梗怨天涯。古槐搖落寒煙裏。漁艇滄波棹晚霞。
三峽哀猿啼夕暉。千門一片擣寒衣。霜天不盡胡笳奏。無數征人望雁飛。
紛紛秋色落西溪。砌草遙憐塞草凄。舳艫難將愁載去。蘼蕪不斷鳥頻啼。
衡陽極目雁書稀。明月空圓繞翠微。一夜風吹楊柳樹。渡頭落葉帶霜飛。
漠漠輕寒鎖畫廊。井梧秋色落銀床。金風桂葉渾消盡。難覓朝雲舊日粧。

送別長女昭齊（時有嶺西之行）

春風春雨太無情。萬里那堪送遠行。日暮枝頭啼杜宇。淚隨風雨一時傾。
繡閣盈盈十八年。風煙粵嶺一朝前。清光難逐天邊月。欲問平安託素箋。
庭前絲雨杏霏煙。陌上鶯啼落日邊。古語雁飛不到處。何須畢竟利名牽。
姊妹牽衣愁別長。隔簾花落又斜陽。魯陽不反援戈日。剪燭紗牕惜夜光。
江月依依照嶺頭。嶺雲漠漠映江流。可憐無限青青柳。不向江邊繫去舟。

花飛別怨草蕭蕭。一片征帆客路飄。腸斷羅巾數行淚。春風回首嶺雲遙。
宮詞

秋風一葉度長門。燭炬流紅照淚痕。彷彿平陽歌吹按。聽殘玉漏自銷魂。
寄六妹

歸心日逐水悠悠。夢裏鄉魂暫一遊。樽酒未曾消別恨。依然復上仲宣樓。
腸斷相看各淚流。小池青草助離愁。子規枝上聲偏絮。作惡風波特送舟。
別後偏憐月正圓。難將別恨問嬋娟。風吹不盡平堤柳。萬縷長懸落日邊。
七夕後一日泊舟垂虹有感

風吹隔岸菱荷香。徒對繁華人自傷。腸斷獨憐波底月。依然流恨向瀟湘。
長江阻風

瑟瑟西風蘆荻秋。江頭暮雨滯人愁。猿聲一夜空山裏。曉對寒煙看白鷗。
暮秋感懷

富不如貧或云謬。賤猶勝貴豈言虛。生成一副悲秋骨。淚滴西風半世餘。
春花秋月兩茫茫。水靜山閒人自忙。惆悵一生能幾許。長將幽恨繫愁腸。

怨復何言徒自泣。空江流恨幾時休。莫將心事供猿嘯。泣向西風也是羞。
啞啞雞聲逼曉寒。殘雲剩月夢應難。誰憐憔悴添腸斷。獨有清燈永夜看。
雙鬢支離風月閒。羞將鸞鏡對衰顏。籬邊吹老黃花候。明月無端又作彎。
平蕪望處正無涯。魂斷空憐雁影斜。萬縷情懷說不得。一番清夢付秦淮。

別金陵官舍庭柏

脆葉凝寒不改稠。黃雲飛繞古城頭。凌風弄翠休回首。君自森森人自愁。
搖落江風引棹長。洛陽春色更茫茫。雲波黯黯煙蘿冷。總把吳霜吹斷腸。
相依百日映簾幽。舉酒嬋娟青影浮。別後不堪江上月。半林雲色任悠悠。

夜雨有感

雨滴疏牕玉漏遲。殘燈明滅照羅幃。愁情簡點隨流水。一任春風戶外吹。
蘇來點水堪爲雨。豈獨巫山始是雲。夢裏不知憔悴盡。落梅猶自惜餘薰。

遣興

茫茫幻境解應難。向把閒愁作夢難。今日又將鈎釣起。漫從夢裏覓愁端。

早秋

炎光初謝送新涼。澹薄秋陰入小廊。清露欲浮瑤兔影。算來只有負時光。

秋日

森森竹徑曲廊幽。翠沼飄涼半水浮。試問樓前舊楊柳。今朝垂縷可勝秋。

七夕贈六妹合歡

雲移曉日映新粧。柳葉迎風拂鏡長。莫問姮娥清夜永。雙星此夕駕河梁。
繡踏蓮花步處生。行雲微曳越羅輕。今宵試看如鉤月。不似簾前隔歲情。
風吹玉露滴支機。銀漢波澄碧影輝。花氣籠煙分麝月。畫屏秋色隱羅幃。
香含玉樹送新涼。彩扇遙遮逗月光。笑指女牛經歲別。相看莫羨有情郎。

對瓶中秋海棠自遣

淡抹秋紅媚素光。豈須香豔引蜂狂。斷腸元是君家慣。何必相看笑斷腸。

感懷

落盡金英自黯然。湘江舊恨至今傳。傷心我獨不能慟。聊草詩篇欲問天。
燕去鴻來秋復春。熱心一片久爲塵。鬢容自愧渾消盡。猶作千迴腸斷人。

再望仲韶京報不至

雲稀月照但供愁。桐葉無憑空自秋。寂寂湘江不寫恨。何須日夜只長流。
銀燈挑盡夜將闌。露濕庭花秋影殘。雁字不知何處落。碧雲流斷楚江寒。

晚景

斜日長風吹暮雲。雲連樹色碧氤氳。花臨返照偏明豔。好染餘曛作舞裙。
夢起

無限殘燈照恨長。忽驚啼鳥喚晨光。春風夢斷休尋覓。夢向春風亦渺茫。
陌上遊絲柳上綿。無情芳草亂春煙。漫將閒意看花落。莫羨鴛鴦濺水眠。

七夕

疏雲橫漢月微明。鸞馭亭亭鵲駕成。露冷瑤階秋寂寂。寶簾螢影夜光平。
烘樓斜月畫新眉。香霧瓏璵玉鎖幃。佳會何須重怨別。不知何處最堪悲。

秋夜

疏影搖搖鳥欲棲。蒼煙白露正淒淒。一庭明月寒花落。寒雁飛時夢已迷。
碧草消煙泣螻蛄。簾前秋色到庭梧。飄飄一葉隨風下。猶帶飛花入夢無。
悲秋不是斷腸初。風景依依雲影疏。玉漏自殘燈自落。半牕斜月小庭虛。

病起晚霽

霽色初開晚景明。疏林積雪映雲平。若將此際爲佳景。不是愁中病裏情。

夜

風葉蕭蕭響暮林。薄幃籠月隔花陰。一聲雁唳碧雲盡。耿耿疏星銀海深。

思張倩倩表妹

困人無力怯愁生。春逼簾櫳花氣清。欲把幽情寄芳草。萋萋偏遶夕陽明。
幾陣花飛到小牕。碧雲春信隔春江。吹殘柳葉渾難問。夢斷雙魚對曉缸。
紅藥翻階第幾枝。落花難與語相思。美人望處青山遠。明月空憐入夢時。

端陽令節風雨蕭然恰如重九所懷索寞漫成八絕聊以自遣

時仲韶在都門也

綠柳斜霏午日煙。楚江菰黍似當年。天涯客夢何年醒。愁對塔前碧草芊。
榴花偏向雨中明。嫩綠枝頭又囀鶯。時序一番驚入眼。卻憐何處最關情。
滿庭風雨似重陽。酒泛蒲觴入悶腸。閒緒不堪消永晝。那須綵繡繫愁長。
新篁隲外初分翠。小綠池中乍泛錢。潦倒一樽看落日。沙邊莫羨白鷗眠。

隨俗聊將艾虎懸。漫搗綠蟻泛花前。苔痕絲雨添新色。聞思惟消一縷煙。
庭陰漠漠碧珊瑚。梧響風聲落井闌。燕市可驚芳草綠。夕陽依舊楚江寒。
梅子初黃雨正肥。露葵無限自芳菲。風前夜合多情思。幾度飄香入絳幃。
碧樹含風日暮時。蕭蕭薄鬢不禁吹。沅江波浪何年息。天際流雲飛向誰。
風雨夜不寐早起適爲仲韶製衣漫成

風雨蕭蕭百感生。孤燈明滅照寒更。洛陽花草春如許。空聽黃鸝黯自驚。
窮愁今古消窮骨。落盡梅花亦自香。秋氣堪悲應我分。不勞春色斷人腸。
樂事家家賞豔陽。何須強效惜春光。靜看天際雲來往。莫管花間鶯燕忙。
青山一點望中長。堪笑張眉學畫粧。羅綺可能勝駿骨。布袍元是士家常。
無題

莫怪予言半是悲。水湯冷煖自家知。也應不爲尋惘悵。誰識無聊獨歎時。
和仲韶燕中憶家

江山滿目老愁鄉。秋月春花總斷腸。欲把瑤箋書恨句。恐教難作一行行。
偶成

疏柳依依覆短牆。薇花寂寂鎖斜陽。秋林一種悲蕭瑟。月怨風愁蕙草霜。

漫興

夜來秋氣入庭皋。一枕藤床隱夢高。竹影漸看移日影。牕前稚子讀離騷。

春日舟行

澄波亂點起沙鷗。春樹籠葱翠欲浮。桃李芳菲時候也。可堪飄落祇供愁。

悼亡女

黃梅雨重碧闌珊。濕翠籠葱梧葉寒。紅蘚欹斜湖石冷。啼鵑淚血草煙殘。
靈衣風捲影珊珊。玉佩無聲清夏寒。舊日樓前楊柳樹。輕絲搖曳夕陽殘。
灰心莫問意闌珊。小簾淒淒逼劍寒。人去竹牕長寂寂。花梢鳥弄月明殘。

長女昭齊週年感悼

日短愁長又一年。花開花謝暗驚遷。白雲若有傷離意。落葉應憐舊彩箋。
鴛鴦鸞何日回。故房絲網綴粧臺。簾垂銀蒜風敲夏。門掩銅環畫不開。
清宵夢斷魄何依。燕去鴻來事已非。每到良辰倍惆悵。庭花俛首一時低。
牕鳥還如昔日啼。簷花落盡影霏微。孤雲細雨誰相識。空向西風淚濕衣。

登臨山水興偏悠。遐舉何能得自繇。今日青山并綠水。茫茫遺恨可勝愁。
石上流泉冷翠蘿。每逢風月作愁魔。詩情酒興渾消卻。去歲今年恨幾何。
逝水悠悠萬恨攻。天涯何處問孤蹤。飛殘青鳥難傳信。猿斷鵲哀泣曉風。
往事嗟爲一擲梭。花鈿賣卻供彌陀。願明空性消塵網。了悟無生一刹那。
雨霰凝陰鬱不消。深香寂寂鎖寒荈。去年薤露悲沈玉。今歲招魂何處招。
凍色侵凌歲暮天。人亡事去景凄然。小牕夜夜風敲紙。泣月啼煙恨九泉。
修竹蕭蕭送歲華。疏楊瑟瑟遶啼鴉。青山一望歸雲杳。落日淒涼照絳花。

見早梅憶女

寒梅昨夜一枝開。管領春風隴上來。惆悵玉顏何處去。露凝疏影獨徘徊。

病中上泐大師（乙亥八月絕筆）

四大幻身終有滅。茫茫業海正深時。一靈若向三生石。無葉堂中願永隨。（傷哉痛哉）

陌頭楊柳辭十首

清陰愁怯杏花寒。碧玉簾垂十二欄。夢裏春風舒黛色。煙光千里暮雲殘。
細雨霏煙鎖畫橋。章臺綠遍舊垂條。無端枝上啼黃鳥。魂向東風日暮消。

澹日雲輕垂落霞。依依陌上漸藏鴉。薄寒不作梨花夢。幾度臨風萬縷斜。
啼鳥枝頭送夕陽。絲絲煙雨織愁長。武昌無恨花飛後。月照紅樓人斷腸。
盡日含顰鬪遠山。畫簷寂寂弄春閒。露濃枝上三更月。舞袖踟躕落霧鬢。
河梁裊裊送雕輪。亂拂長條映水濱。曉鏡最憐愁黛蹙。細腰長似楚宮人。
風裏紛紛亂若愁。漫垂綠帶曲池頭。花籠薄霧銀屏晚。影入紗牕月半鉤。
飛花滿路綴流絲。漢苑三眠日上遲。一曲陽關雲漠漠。天涯芳草盡離離。
隋堤三月正芊綿。山外平蕪啼杜鵑。莫向瀟陵橋畔望。不堪回首落春煙。
風吹綠水撲柔條。燕鶯鶯語寂寥。春去偏留蝴蝶恨。愁連紫塞夢迢遙。

竹枝詞八首

隔浦蓮歌唱夕陽。田田荷水弄清香。輕風搖曳冰紗袂。似欲相邀納晚涼。
傳聞鶯渚築平波。試買輕舸棹碧莎。條忽雲生起風浪。滿船舟子盡相呼。
八月湖邊紫蟹肥。荳花棚底露痕微。但憑嘯傲煙波闊。採得蓴絲棹月歸。
昨夜沙汀新雁來。蘆葦影落月徘徊。無端玉露如珠下。濕盡秋花點碧苔。
門臨綠水遠蒹葭。雪浪風搖逐岸斜。日晚漁舟收網釣。穿來玉箸照菱花。

泗洲泉水味甘涼。七月河斜荳蔻香。競設蘭盆十五夜。波光澄影卽慈航。
遠樹微茫湖月懸。銀魚風起浪頭鮮。鄉村偏覺秋光美。豔逼芙蓉水底天。
清秋桂露冷寒香。一夜西風剪葉黃。湖水澄澄浸明月。月明何處不瀟湘。

月

長河空碧縷雲浮。萬里寒光玉樹秋。但願長如粧匣鏡。休教還作畫廉鉤。
一片砧聲怨隴頭。班姬愁絕玉塔幽。茫茫竊藥當年事。惹得清光庾亮樓。

雨

萬里蒼茫碧霧垂。蕭蕭瑟瑟散輕蕤。春光染暈胭脂濕。鷓鴣啼前更助悲。

游絲

百尺悠揚縈落花。愁春無力怯春華。行人拂遍東風路。繞樹爭飛隔絳紗。

蛺蝶

遲日園林簇錦成。穿花度柳逐飛英。翩翩不管春將晚。來去長如一夢輕。

蟬

高柳含風斷復吟。綠陰庭午響幽深。夕陽影裏聲偏切。遠韻長流入素琴。

梅花百首（先有集行世故不復入）

松

秦時留得大夫名。風勁修條葉底清。歲暮青青無改色。月明長自作濤聲。
閒來樹下挹涼颼。青蔭渾忘俗世囂。焉得一溪流水枕。靜聽清夜鶴天遙。

柳

忽報東風到陌頭。依然張緒舊風流。年年春日爭攀折。猶自長條覆翠樓。

竹

繁葉參差翠塢陰。森森長伴歲寒新。空濛倒影斜陽碧。曉露青蔥煙徑深。

梧桐

藥砌蘭堦苔影寒。棲鸞彷彿入雲端。青浮玉露垂珠粟。一葉秋聲入井幹。

桃花

井上天枝舞絳裳。未央猶憶鬪新粧。清明雨後悲啼鵲。洞口花飛恨阮郎。

碧桃

風光三月景透迤。染就臙脂簇絳絲。戶外不知春幾許。朝來晴日映繁枝。
玉蘭

冰潤香肌不似梅。遙看疑是兔園來。最憐花暖鶯初弄。一夜東風玉砌苔。
西府海棠

問君何物作花司。管領東風第一姿。還有飛瓊春色在。未教君獨占花時。
（與亡女瓊字偶同）
花下故爾及之。

垂絲海棠

煙籠微雨嫩紅柔。弱韻消春脈脈愁。昨夜宿醒猶未解。嬌容無力懶扶頭。
貼梗海棠

東風吹破草間煙。亦向堦前逞色鮮。宿霧乍消初映日。畫欄堪作一時憐。
迎春花

臘盡梅邊柳乍青。上林春信到銀屏。深紅淺碧羞爭豔。聊著黃裳作小星。
玉簪花

涼秋颯颯晚風清。香遞雲綃雪剪成。鶴唳碧空仙駕遠。霓裳吹落羽衣輕。

秋葵花

籬菊枝頭未吐黃。先催檀暈報秋光。西風落日湘簾捲。憔悴難禁金縷裳。

秋芍藥

惆悵河梁贈別時。春風回首綠楊枝。翠蛾愁斂秋煙裏。腸斷佳人昔日詩。

秋海棠

妖紅不與春妍競。瀟灑疏簾秋日映。鶯啼上苑落花時。至今夢斷愁臨鏡。

蘭花

曉日籠雲麗楚粧。含蕤愁怯夜來霜。青青長泛風前韻。素帶時飄九畹香。燕夢悠悠沅水流。紫莖含露月華浮。麝蕪吹滿堂前綠。杜若空芳蕙草秋。

蜀葵花

濯錦江中散彩氛。霏煙拂露染綃紋。杜鵑聲向巫雲落。吹向塔前幾色分。

錦葵花

縹緲輕紅若有情。參差小綠映雕楹。寶家機上堪裁就。露下渾疑粧點成。

金桃

風前裊裊泛輕棚。欲擬陶家入醉鄉。豔質已隨春化去。花時灼灼爲誰芳。
萱草

翠黛愁春春漸遠。絳仙蝶粉怨斜陽。新來雨過簾櫳靜。倩爾忘憂可暫忘。
洛陽花

借得春風桃李蕤。綴成小景媚雲楣。而今不是花時候。紅紫殷妍寂寞吹。
剪春羅

美人牕下裁鴛綺。猶怯春寒剪刀冷。依依偏向碧塔陳。低覆桐陰傍金井。
夜合花

麝馥盈盈映繡幃。月明風露染蛾眉。晚來庭院鶯啼後。去向陽臺夢裏隨。
淡竹葉

瀟湘落日片雲飛。倒影湖山映翠微。濃綠低連芳草徑。輕藍采采作羅衣。
薔薇花

庭陰低綠日初長。紅影扶疏拂畫牆。墻畔紛紛新蝶蝶。撲開花氣襲羅裳。
木香花

燕麥青青梅子肥。花時春事正芳菲。薔薇架上隨風起。紅雨長兼白雪飛。
朱藤花

柔條渾似隋堤柳。紅占煙光上苑桃。遲日半簷春寂寂。落霞飛露綴輕綃。
蝴蝶花

尋春栩栩東風曉。芳草閒庭隨意縹。東家不向西家飛。深鎖塔前愁悄悄。
竹蘭

細香生處浮青玉。春碧瓏葱垂鳳粟。憐君欲紉惜花輕。楚佩芳枝倩誰續。

茉莉花(二十首)

薰風巧剪雪衣多。楚客何須製芰荷。故國年年迷遠夢。香含月下只饜蛾。
清露晨流拂袖涼。卻憐何處白雲鄉。紅芳占斷青陽節。素質長依玉砌傍。
舞罷霓裳宿麝房。溫泉初浴最風光。瓏葱自有年香玉。堪笑何郎傅粉粧。
露滴瑤臺月正明。飛瓊吹落步虛聲。山香夜夜冰綃染。清韻飄來入素屏。
玉容雨洗似含愁。耐暑偏宜日暮幽。碧樹西風悲宋玉。瓊蕤猶得伴清秋。

西域移來音信沈。碧雲空自覓青禽。徘徊月下低籠玉。宛轉粧前鏡裏簪。
如許閒宵似廣寒。翠叢倒影浸冰團。梅花宜冷君宜熱。一樣香魂兩樣看。
休誇桃葉與桃根。栽雪班姬試較論。玉羽欲乘風乍起。化雲迷落洗頭盆。
涼月窺人在畫樓。卻宜銀燄玉塔頭。雕欄寂寂薰風裏。深夜閒庭若素秋。
羞爭豔俗絕芳塵。雨後亭亭更可人。十里吳宮舊花徑。若耶溪畔是前身。
玉粟將舒似索憐。醉鄉疑泛白雲船。三春桃李休相笑。不是隨風榆莢錢。
百蘊何於日暮薰。芳菲不鬧亂紅殷。曉風庭院煙籠幌。夜月簾櫳練色分。
幽葩清潤絕紅塵。嫩綠庭前月掛銀。越女相隨巫峽夢。獨留丰采尙傳神。
牡丹何事獨稱王。不向薰風逞豔香。摘取夜深歸繡幙。麗歌何得頌芝房。
鄉國當年據尉陀。至今猶憶進珊瑚。寂寥雨過南牕外。學寫春風嶺上圖。
拾得華清遺玉鈿。栽來和月共澄鮮。晚雲惆悵飛將盡。清露香叢濕翠煙。
把酒看花興正濃。只愁秋色妬芳容。素蛾若肯相憐惜。吹落卿雲護幾重。
風動香開十二樓。珠簾一帶上瓊鈎。若使麗詞歌白雪。漢宮應不惜纒頭。
花月渾如不夜城。浮光遙映水晶屏。良宵何處最佳景。玉樹枝頭幾點螢。

百尺遊絲引夢長。吟魂贏得暗縈香。何將麗質供枯管。詩句誰堪洗結腸。

鷓鴣吹（午夢堂遺集卷下）

吳江 沈宜修苑居 著

詩餘（一百九十首）

孫王憶

天涯隨夢草青青，柳色遙遮長短亭。
枝上黃鸝怨落英，遠山橫，不盡飛雲自在行。
（此詞夢中所作，後繼九闋）

風吹曉夢別關山，斜月人歸牕影殘。
蝶怨蜂愁春意闌，隔離欄，露濕飛花綠雨寒。
芳箋題罷困紅綃，小夢無端過斷橋。
月影江聲送去潮，漫魂勞，簾外輕風到柳條。
雪屏寂寂鎖殘春，錦瑟年華已半塵。
芳草留香燕語新，繡苔茵，金釧瓊簫總帶人。
梨花夢轉杏花寒，碧葉琅玕玉佩珊。
零落春花恨遠山，倚欄看，又見煙籠日半竿。
銀燈花謝酒初醒，夢去愁來月半明。
玉漏沈沈夜色清，翠生生，芳草能消幾許情。

翩翩蝶粉落梅梢。金井烏啼隔絳綃。春樹迷津歸路遙。暗香消。長把閒情逐水飄。
海棠枝上杜鵑啼。憔悴春光燕子泥。香冷鑪煙花影移。柳綿飛。落盡紅英水拍堤。
芳菲誰向夢中憐。楊柳長亭幾處煙。雲斷霞飛獨黯然。浪書傳。細草空連落日邊。
錦川珠浦憶仙遊。花落橫江逐夢浮。夢覺紗牕月半鉤。影悠悠。依舊王孫桂樹留。

又(歲暮舟行)

疏煙平野望蒼茫。草色蕭蕭帶葉黃。一片青山遠斷腸。雁歸忙。只剩寒波送夕陽。

如夢令(別恨)

殘月斜窺籬色。香鑪夢回難覓。正是斷腸時。禁得許多相憶。岑寂岑寂。雁唳一聲寒碧。

又(元夕感懷)

人靜夜寒如昨。兩度春風蕭索。疏影月朦朧。依約半庭秋籜。垂幕垂幕。牕外那知梅落。

又(月夜)

月暈天邊常有。心緒渾如中酒。酒醒是何時。樓外烏啼楊柳。依舊依舊。贏得梅花消瘦。
明月影斜花縷。故向畫屏寒透。雪鬢幾勝情。脈脈斷魂時候。知否知否。今夜綠牕紅袖。

又(秋暮)

平野遙連湘渚。暮色涼生碧樹。待望月華明。愁聽閒宵風雨。無緒無緒。最是寒煙數縷。蕭瑟西風初動。又是一番涼送。燈灺小牕斜。往事不堪新夢。愁重愁重。綆短銀瓶水凍。

又(寒夕)

風月天邊長美。佳興如之何矣。蕭瑟滿疏林。慣與愁懷相倚。何似何似。楓落年年流水。

長相思(秋夜)

風蕭蕭。雨蕭蕭。四壁吟蛩入夢遙。愁腸酒不消。燈影搖。帳影飄。聽盡牕前一夜焦。斷魂

難自招。

路漫漫。恨漫漫。竹葉撩風送響繁。淒清滿畫欄。夜將闌。漏聲殘。看盡餘燈伴曉寒。愁懷

欲遣難。

點降唇(春閨)

啼鳥嬌春。細風吹向愁邊近。斷腸難問。嫩籜含新粉。夢遶天涯。總是無憑準。黃昏信。落

紅成陣。買盡東風恨。

又(代人寫恨)

滿目秋光。厭聽反舌啼聲惱。淚流多少。回望巫山杳。幾度思量。落得空煩惱。須知道。斷

腸難告。總付平波渺。

寶鏡空圓。薄情猶憶當初否。指環在手。對面成拖逗。自悔無端。信得虛名驟。重陽後。安
排消瘦。愁病長相守。

往事堪悲。斷魂最是風光好。又彈別調。再續應休了。待欲拋開。忍見雙歡笑。清燈悄。黃
花愁老。恨逐西風曉。

浣溪紗（暮春感別）

芳草蓮天不耐芟。柳絲無力繫征帆。垂條空折手纖纖。
人去河梁生寂寞。燕歸簾榭自呢喃。可堪對酒濕青衫。
飛絮江干雨乍晴。風前密葉綴紅英。落霞偏映夕陽明。
不爲春愁慵簇蝶。自多閒悶惱啼鶯。斷腸魂夢兩無憑。

又（春情）

澹薄輕陰拾翠天。細腰柔似柳飛綿。吹簫閑向畫屏前。
詩句半緣芳草斷。鳥啼多爲杏花殘。夜寒端露濕鞦韆。
檻外游絲樹樹穿。斷腸柳色最連天。春風偏爲悶嬋娟。

細雨自留金鈿夢。野花偏襯玉驄烟。暮霞盡飛月明邊。

又（和君晦）

拋擲瓊簫懶弈棋。粉香融汗潤酥肌。花時常自怨春遲。
上苑宮鴉啼落日。畫屏香鴨鎖離悲。淡勻酒色暈紅腮。
春思繁人引線添。井梧初葉露餘霑。茶蘼開到雨廉纖。
午枕夢聽新乳燕。花篩日轉舊垂簾。無情風絮碧苔粘。

又（秋思）

東盡纖羅不禁秋。白蘋風浪幾時休。斷腸明月又如鉤。
露濕叢花三徑老。簾移疏影一庭幽。清砧久欲倚重樓。
細雨浮烟隔絳紗。銀床寂寞鎖寒花。可堪秋思正無涯。
半渚西風催怨葉。一天落日送歸笳。奈教獻悶暮雲賒。
桂蕊侵香樹影斜。平蕪遠映畫欄遮。洞庭秋望幾人家。
蛩露濕殘山夜月。雁風飛落暮天霞。自憐粧鏡減容華。

又（七夕）

落日粧成罷錦梭。步搖仙佩紫雲羅。銀河風靜出金珂。
青鵲粧催眉月小。紫鸞彩簇步雲多。雙棲玉樹笑嫦娥。

又（閨情）

泛水浮紅自在流。風前花落思悠悠。堤邊楊柳弄輕柔。
細雨淡烟芳樹寂。輕香淺夢畫屏幽。寸腸禁得許多悠。
倚遍欄杆對夕陽。柳條閒自掛愁長。小池新細臥鴛鴦。
黃鳥啼殘憐夜月。梨花吹瘦惜餘香。東風不管斷人腸。

又（秋閨）

新月桐籬影上鉤。露寒庭院一天秋。金風颯颯夜悠悠。
砧杵帶愁敲遠夢。雁聲唼恨落高樓。碧雲流斷暮江幽。

又（時往金陵贈別張倩倩表妹）

楓葉無愁綠正肥。多情空自繞鷗磯。今宵千里斷腸時。
一棹青山人正遠。半床紅豆雨初飛。別離無奈思依依。

又（侍女隨春破瓜時善作嬌態之態諸女詠之余亦戲作）

袖惹飛烟綠鬢輕。翠裙拖出粉雲屏。飄殘柳絮未知情。
千喚懶回。乍看蝶。半含嬌語。恰如鶯。嗔人無賴。惱秦箏。
春滿簾櫳。不耐愁。蔚藍衫子。趁身柔。楚臺風月。那禁留。
畫扇半遮。微絕面。薄鬢推掠。只低頭。覷人偷自溜。雙眸。

又（春日）

細雨庭皋濕翠苔。深紅淺碧綴良宵。東風惹得燕噓嬌。
楊柳絲搖春不定。梨花粉褪月無聊。年年空自鎖春饒。
誰送春風。特地來。漫憐情思。怨花猜。被花猜著。只徘徊。
舊恨無人能捉摸。新愁獨我未安排。眼前何處可忘懷。

又（和仲韶寄韻）

春事闌珊可怨嗟。愁看柳絮逐風斜。碧雲天際正無涯。
莫問燕臺曾落日。休憐吳地有飛花。春風總不屬儂家。

又（仲夏卽事）

喜得新來幾日閒。半晴梅雨綠牕間。小池初漲碧灣灣。